

## Tí tan jína chrónka ch'ín Marcos

*Nteje mé kjuakoxin ch'ín Juan Bautista  
(Mt. 3.1-12; Lc. 3.1-9, 15-17; Jn. 1.19-28)*

<sup>1</sup> Xikihí mé xrankíxixín tí tan jína kuènte Jesu-  
cristo mé tí Xjeen Dios.

<sup>2</sup> Ósé mé kjuák'e ch'ín Isaías mé ijnko nkexro  
tsíchr'án Dios chrónka itén ch'án k'uékjin ch'án  
nkexrí nixjehe Dios tí Xjeen ch'án ntáchro kixin:  
Janhan tsochr'an ijnko nkexro tsochrónka tan  
kuèntana tsitónxin ntja,  
kixin tsjasiyóxin ch'án ntja kuéntá.\*

<sup>3</sup> Ntá tsinhin sín itén ijnko nkexro tsjak'e nteje  
ts'èya tsontáchro kixin:

“Tóxakonhanrá ncheyóxinrá ntja tsixin Ìnchéni, tak-  
itjehérá ijnko ntja ntoí.”†

<sup>4</sup> Tíha mé xíteyá ikui ch'ín Juan Bautista, mé  
xikaha kjuák'e ch'án nteje kuikite ch'án chojni.  
Kjuakohe ch'án chojni ntíha kixin chrókjuinkí sín tí  
nkehe tjenkayáxin sín chrókuítóhe sín tí ijje sín ntá  
chrókuikite sín kixin xikaha mé chrókjuìn ijje sín.

<sup>5</sup> Itsjé chojni kuixin estado Judea la ko tí chjasin  
Jerusalén ikui sín tí kjuák'e ch'ín Juan kuínhin sín  
tí nkehe kjuako ch'án ntá chrónka sín tí jje yámá  
sín ntá ch'ín Juan mé kuikitexín sín ch'án ntario  
Jordán.

---

\* 1:2 Malaquías 3.1 † 1:3 Isaías 40.3

<sup>6</sup> Tí ké ch'ín Juan mé tsík'óna kaxree kocamello la ko tí nkehe chr'ínkat'óxin ch'án mé tsík'óna tjoa. A ntá tí nkehe kjóne ch'án mé kochjoá la ko tsjen kotsjenta tónoxín nteje. <sup>7</sup> Mé kjuák'ekjakohē ch'án chojni ntáchro ch'án kixin:

—Iton tí janhan mé tsichréhe ijnko nkexro antsí má chóna kjuachaxin, a ntá janhan la kánhyó. Méxra chrókósuana chrókjuasintanka tí correa tí tokaté ch'án. <sup>8</sup> Janhan mé inta ó kuikitejínra. Ntá jehe ch'án mé tsikitejínra ch'án tí Nchakuen Dios —ichro ch'ín Juan.

*Ch'ín Juan kuikite ch'án tí ch'ín Jesús  
(Mt. 3.13-17; Lc. 3.21-22)*

<sup>9</sup> Ntá tí yaon a ch'ín Jesús, k'uaxrjexín ch'án chjasin Nazaret estado Galilea. Na ntá ch'ín Juan mé kuikitejín ch'án tí ntarío Jordán. <sup>10</sup> Tió k'uaxrjenkixin ch'ín Jesús tí inta, ntá xrínahya titaya k'uíkuèn ch'án na ó xitjehe nkajní la ntá tí Nchakuen Dios éxí kontóá k'uínkajinxin ntiha ntá kjuák'e chrítaón kja ch'án. <sup>11</sup> Ntá xrínahya kuínhin sín nixja Dios nkaya nkajní, ntáchro kixin:

—Janhan mé xjanna imá tjuaha tí jaha. Imá chàna kixin nchexiteyàna tí jaha —mé xikaha kuínhin sín.

*Ch'ín Tsohren chrókjuachroe tí ch'ín Jesús kixin  
chrókjuasin ch'án jie  
(Mt. 4.1-11; Lc. 4.1-13)*

<sup>12</sup> Ntá tí Nchakuen Dios mé sákjuíko tí ch'ín Jesús nteje. <sup>13</sup> Kjuák'e ch'án cuarenta yaon tí nteje la ko ntiha mé k'uixin ko jiehe ntá ch'ín Tsohren a na mé tjinkaon chrókjuachroe ch'án. La ntá tí sín ángel kui k'uàyakonhen tí jehe ch'án.

*Ch'ín Jesús kjuankíxixín kjuako ch'án estado Galilea*

*(Mt. 4.12-17; Lc. 4.14-15)*

<sup>14</sup> Kjuixin kjuák'echjina ch'ín Juan ntøechiso ntá ch'ín Jesús na mé sákjuí ch'án nó estado Galilea sákjuíkjakøhe ch'án tí sín ntiha tí tan jína kuènte Dios. <sup>15</sup> Ntá ntáchro ch'án kixin:

—Ó kjuixraká tí yaon, la ó tsi tí kjuachaxin kuènte Dios ts'etøan ch'án. Chrókuítóhérá tí nkehe jínahya k'uékjenkayáxinrá a ntá chrókuítekáonrá tí tan tsaáxinrá —mé xíkaha kjuako ch'ín Jesús.

*Ch'ín Jesús k'uíyehé noó tí sín itsé koche*

*(Mt. 4.18-22; Lc. 5.1-11)*

<sup>16</sup> Ch'ín Jesús tjetji ch'án chrínta ntayaon Galilea ntá xrínahya k'uíkon ch'án tí ch'ín Simón la ko tí kíchó ch'án mé it'in Andrés, mé koche xritsé sín, ntá tinkák'e sin tí nchísén chrínkí ntá. <sup>17</sup> Ntá ntáchro tí ch'ín Jesús kixin:

—Chréhérá tí janhan, ntá tsøtjahárá xra tsjéyará chojni —ichro ch'án.

<sup>18</sup> Ntá tuénxín kuítóhe sín tí nchísén k'uétséya sín koche ntá sákjuíko sín ch'án.

<sup>19</sup> Ntá kjínhya kjuíji ch'ín Jesús ntá k'uíkon ch'án tí yaá xjeen ch'ín Zebedeo. Ijnko mé it'in Jacobo. A ntá tí í jnko la mé it'in Juan. Jehé sín la ko tí it'é sín tjejóxenhen sín tí ntabárco tjejójtjonité sín tí nchísén tséya sín tí koche. <sup>20</sup> Na ntá ch'ín Jesús mé k'uíyehé tí jehé sín kixin kjaxin tsochréhe sín ch'án. A ntá tuénxín kuítóhe sín tí it'é sín ch'ín Zebedeo kuítóeko ch'an tí ntabárco la ko tí sín tjinkítsa ch'án ch'e xra. A ntá jehé sín sákjuíko sín ch'ín Jesús.

*Ijnko chojni chón̄ta injko nchakuen tí jínahya  
(Lc. 4.31-37)*

<sup>21</sup> Ntá kjuíji sín tí chjasin it'in Capernaum. Na ntá tí yaon t'ok'éhe sín mé k'uixenhen ch'in Jesús tí n̄nko Israel. Na ntá ntaha mé kjuankíxin ch'án kjuako ch'án. <sup>22</sup> A ntá tí chojni siín ntiha mé chrakon sín kuínhin sín tí nkehe kjuako ch'án kíxin kjuakoxin ch'án kíxin chón̄ta ch'án kjuachaxin, la jehya éxí tí sín maestro tjako tí ley, ichro sín. <sup>23</sup> Ntá tí n̄nko Israel chjasin ntiha itjen injko chojni chón̄ta injko nchakuen tí jínahya k'uíyato ntáchro kíxin:

<sup>24</sup> —¿Nkekuènté tjiaté tí jeheni kaín ni? Jaha Jesús kjuíxian Nazaret. ¿Á k'uinka kíxin s̄nchek'itjáyanni? Janhan mé ó kjuáts̄oan tí jaha, la ko nòna kíxin jaha tí nkexro tjóá kuènte Dios —mé xikaha ichro tí nchakuen tí jínahya.

<sup>25</sup> Ntá ch'in Jesús mé k'uetuēnhen tí nchakuen tí jínahya ntáchro ch'án kíxin:

—Tániá, t'axrjéxian tí jehe ch'án —mé xikaha ichro ch'in Jesús.

<sup>26</sup> A ntá tí nchakuen tí jínahya mé kjuínchek'aniáte tí ch'in a la ko k'uíyatoxín tsen ntá k'uaxrjexín tí ch'in a. <sup>27</sup> A ntá kaín sín chrakon sín ntá kjuanchankíhi sín kichó sín, ntáchro sín kíxin:

—¿Xá nkexro tíha kíxin tjako ch'án nkehe n̄ixin? Jehe ch'án chón̄ta kjuachaxin kíxin t'etuēnhen ch'án tí nchakuen tí jínahya la titekakonhen —mé xikaha ichro sín.

<sup>28</sup> A ntá imá tjoka k'uíxikónohe kaín xín sín estado Galilea kíxin nkexrí tí kjuachaxin chón̄ta tí ch'in Jesús a.

*Ch'ín Jesús kjuínchekitohe jína tí ich'ee tí ch'ín Simón Pedro*

*(Mt. 8.14-15; Lc. 4.38-39)*

<sup>29</sup> Ntá tí ch'ín Jesús mé k'uaxrjexín ch'án tí nínko, a ntá tuénxín sákjuiko ch'án ch'ín Jacobo la ko ch'ín Juan, sákjuí sin ntøe ch'ín Simón la ko ch'ín Andrés. <sup>30</sup> Ntá tí ich'ee ch'ín Simón na tjetsínka tjan, níhi tjan kixin chóna tjan sóa. Ntá chénka sín tí ch'ín Jesús. <sup>31</sup> Ntá kóchjina ch'án tí tjetsínka tjan ntá itsé ch'án tja tjan k'uínkatjen tjan. Ntá tuénxín kjuínhin tjan tí sóa chóna tjan. Ntá kjuanjon tjan nkehe sine sín.

*Ch'ín Jesús kjuínchekitohe jína nchónhya chojni níhi*  
*(Mt. 8.16-17; Lc. 4.40-41)*

<sup>32</sup> A ntá tió kjuiátaón yaon tió k'uíxin tie kuikøhe sín tí ch'ín Jesús kaín tí sín níhi la ko tí sín chóna nchakuen jínahya; <sup>33</sup> na ntá kuenté chjasin kójnkotsé sín k'uíxintankí sin ntója tí nchia a. <sup>34</sup> Ntá kjuínchekitohe ch'án jína kaín tí chojni níhi chóna nchónhya clase chin la ko kuakitsje ch'án kaín tí nchakuen tí jínahya. Na í kjuanjonhya ch'án kjuachaxin kixin tsonixja tí nchakuen tí jínahya kixin ó kjuátsøan tíha nkexro tí jehe ch'án.

*Ch'ín Jesús mé kjuako ch'án estado Galilea*  
*(Lc. 4.42-44)*

<sup>35</sup> Ntá naxa sítié k'uàya ch'ín Jesús k'uaxrjexín ch'án tí chjasin a sákjuí ch'án nteje kixin ntiha nixjeexín ch'án It'é ch'án tjen nkaya nkajní. <sup>36</sup> Ntá ch'ín Simón la ko tí sín xriko ch'án mé sákjuíkjeyá sín ch'án. <sup>37</sup> Ntá k'uitja sín ch'án ntá chénka sín kixin:

—Kaín sín xritjeyá sín tí jaha —ichro sín.

<sup>38</sup> Ntá ntáchro ch'ín Jesús kixin:

—Sátsjini ókjé chjasin chjinaxón kixin ntaha kjaxin tsjákoḥa sín tí tan jína, kixin xikaha mé tí k'uaxrjexiā chjasin ntiha.

<sup>39</sup> Ntá nkuíxín estado Galilea sákjuí ch'án kuinkákjako ch'án jnkojnko nínko la ko kuakitsje ch'án tí nchakuen tí jínahya chónṭa sín.

*Ch'ín Jesús kjuínchekitoḥe jína ijnko ch'ín chónṭa chinlepra*

*(Mt. 8.1-4; Lc. 5.12-16)*

<sup>40</sup> Ntá kui ijnko ch'ín chónṭa chinlepra kjuák'exín toch'in ch'án nkayakon ch'ín Jesús ntá chrónóeḥe ch'án ntáchro ch'án kixin:

—Tí tjínkavan jaha la jína chrókjuínchekitohéni jína —ichro ch'án.

<sup>41</sup> Ntá ch'ín Jesús na imá kuikonóeḥe ch'án tí ch'ín a na ntá kjuentoá tja ch'án kjuak'e tja ch'án chrítaón tí ch'ín níhi a ntá ntáchro ch'án kixin:

—Méxra xikaha tjínkavan. Ntá jie sintakitoha jína —ichro ch'án.

<sup>42</sup> A ntá xikaha ntáchro ch'án ntá tuénxín kjuìn tí chinlepra ntá kuítóḥe ch'án jína. <sup>43</sup> Ntá k'uētuenhen ch'ín Jesús tí ch'ín a kixin tjoka sátsji ch'án, ntáchro ch'án kixin:

<sup>44</sup> —Ninkexró chenkahya ntihi; jehó sátjia tjákoḥé tí ch'ín nchāt'á kixin ó kjuínhan tí chinlepra la ko tjánjuan tí nkehe tsík'etoan ch'ín Moisés† kixin tsonoexín kaín xín chojni kixin ó kuítóḥa jína —ichro ch'án.

<sup>45</sup> A ntá tí ch'ín tsíkitoḥe jína, a ntá sákjuí ch'án kjuankixin ch'án chénka ch'án kaín xín chojni

---

† 1:44 Levítico 14.1-32

kíxin nkexrí kuítóhe ch'án jína. Méxra xitjahya ts'ixenhen ch'ín Jesús noxín nijnko chjasin na ntá k'uaxrjenta ch'án tí kohya chojni. Ntá kjónté la kjuitsjehe sín ch'án kjuixín sín nkuíxín chjasin.

## 2

*Ch'ín Jesús mé kjuínchekitohe jína ijnko chojni tsík'en toté*

*(Mt. 9.1-8; Lc. 5.17-26)*

<sup>1</sup> Ntá ó k'uátsínka iso yaon ntá ch'ín Jesús mé xíkjan ch'án chjasin Capernaum. Ntá k'uixikónohe chojni kíxin ijnko nchia ntiha kjuák'e ch'án. <sup>2</sup> Ntá tuénxín nchónhya chojni kóchjina ntá kjuachahya tí nchia k'uixixenhen sín la ko kjaxin kjuachahya tí ntója nchia chrók'uixintankí sín. A ntá ch'ín Jesús kjuako tí tan jína kuente Dios. <sup>3</sup> Ntá kui noó sín tinkátsénkí sín ijnko ch'ín tsík'en toté ch'án. <sup>4</sup> Kjánchó xitjahya kóchjina sín tí tjen ch'ín Jesús kíxin nchónhya chojni síin. La ntá k'uit'ótjen sín tí chrítaón nchia a ntá k'óxrat'ó sín. Na ntá ijnko hno kjuak'ete sín tí kania tjenkáya tí sinníhi a ntá kjuinkajin sín ntoí tí tjen ch'ín Jesús a. <sup>5</sup> Tió k'uikon ch'ín Jesús tí nkehe kjuích'e sín ntá ó nohe ch'án kíxin chaxín imá tinkáchónki sín tí jehe ch'án. Ntá nixjehe ch'án tí sinníhi ntáche ch'án kíxin:

—Xjeenni, ó kjuixin kjuìnhan tí jje chonta —mé xikaha ichro ch'án.

<sup>6</sup> Na ntá iso tí sín maestro tjako tí ley tjejótjaxin sín ntiha na ntá jehó sín mé kjo sín asén sín kíxin: <sup>7</sup> “¿Nkekuènté xikaha nixja tí ch'ín i ncheyóhe ch'án asén ch'án Dios? Kíxin ninkexró xitjahya tsjatsin ijje kíxin jehó Dios mé chóna kjuachaxin tsjatsen

ijíé chojni”, mé xíkaha ikjo sín asén sín. <sup>8</sup> Ntá ch'ín Jesús la ó nohe ch'án nkehe tjenkayáxin sín. Ntá ntáchro ch'án kixin:

—¿Nkekuènté kixin xíkaha tjenkayáxinrá?  
<sup>9</sup> ¿Nkehe antsí má xrahya chróntátjan ch'án? ¿Á antsí xrahya chróntátjan ch'án kixin ó kjuixin kjuìinhin ch'án tí jie yámá ch'án, o á antsí xrahya chróntátjan ch'án kixin chrók'uinkatjen ch'án chrókjuenájín ch'án kaníee ch'án ntá sáchrókjui ch'án? <sup>10</sup> Méxra jie tsjákoxian kixin tí Xjeen Dios K'óna Chojni mé ntihi chjasintajni chóna kjuachaxin tsjakjùinhin ijíé chojni —ichro ch'án.

Ntá ntáche ch'án tí ch'ín xitjahya tji kixin:

<sup>11</sup> —Jaha tétuanhan t'inkatjen, tjenájían kaníaa na sátjia ntqa —ichro ch'án.

<sup>12</sup> A ntá tí sinníhi na tuénxín k'uúinkatjen ch'án kjuák'exín toté ch'án na kjuenájín ch'án kaníee ch'án na kuámá ch'án k'uaxrjexín ch'án nchia sákjuí ch'án. Na ntá kaín tí sín siín a tsjehe sín nkexrí kónhen na chrakon sín la ko kjuanchehe sín Dios kjuasáyé. Ntá ntáchro sín kixin:

—K'uúikonhyéni tí nkehe i —ichro sín.

*Ch'ín Jesús k'uúyehé ch'ín Leví  
 (Mt. 9.9-13; Lc. 5.27-32)*

<sup>13</sup> A ntá chr'éxin ch'ín Jesús mé sáxíkji ch'án inaá chrínta ntayaon. Ntá kaín xín chojni kóchjina sín tí tjen ch'án ntá kjuako ch'án. <sup>14</sup> Ntá k'uátsínka ch'án k'uúikon ch'án tí ch'ín Leví xjeen ch'ín Alfeo tjetjaxin ch'án tjenchekjènkj ch'án. Ntá ch'ín Jesús mé k'uúyehé ch'án, ntáchro ch'án kixin:

—Chr'éhé tí janhan —ichro ch'án.

Ntá ch'ín Leví mé tuénxín k'uínkatjen ch'án chréhe ch'án tí ch'ín Jesús.

<sup>15</sup> A ntá ch'ín Jesús kjuák'e ch'án ntəe tí ch'ín Leví, la ntá kjuanjon sín nkehe sine ch'án la ko kjaxin k'uéjó nchónhya tí sín nchekjènkì la ko kjaxin í so chojni chóna jìe. Mé kaín tí sín a mé tjejótxaxin sín tjejóneko tí ch'ín Jesús la ko tí sín k'uájiko ch'án, kixin nchónhya chojni chréhe sín tí jehe ch'án. <sup>16</sup> Na ntá tí sín maestro tjako tí ley la ko tí sín fariseo k'uíkon sín kixin ch'ín Jesús tjejóneko kaín tí sín nchekjènkì la ko tí í so sín chóna jìe, a ntá ntáche sín tí sín k'uájiko ch'án kixin:

—¿Nkekuènté kixin tí maestro kuèntará neko ch'án la ko t'íkəo ch'án tí sín nchekjènkì la ko tí í so sín chóna jìe? —ichro sín.

<sup>17</sup> Na ntá ch'ín Jesús kuínhin ch'án nkehe tí tjo sín a. Ntá nixjehe ch'án tí sín a ntáchro ch'án kixin:

—Tí sín níehya t'ichjánxienhya sín nkexro sich'e xroə. Náhí. Jehó tí sín níhi mé t'ichjánxinhin sín nkexro sich'ehe sín xroə. Janhan na k'uinkahya ntihi kixin chrók'uíyaha chojni jína tjejó sín. Náhí. K'uinka kixin ts'íyaha chojni chóna jìe —ichro ch'án.

*Tjanchankíhi sín tí ch'ín Jesús kixin á chrókjónehya sín tío tsonixjehe sín Dios  
(Mt. 9.14-17; Lc. 5.33-39)*

<sup>18</sup> Ijnko yaon na mé kaín xín tí sín k'uék'ajiko ch'ín Juan Bautista la ko tí sín fariseo a mé kjónehya sín kuenté yaon kixin mé xíkaha ts'áyéhe sín kjuaxróxin, ichro sín. A ntá kui iso chojni nixjehe sín tí ch'ín Jesús ntáchro sín kixin:

—¿Nkekuènté kixin tí sín k'uék'ajiko sín tí ch'ín Juan la ko tí sín fariseo la nehya sín jie, a ntá tí sín xrikoa la ine sín? —ichro sín.

<sup>19</sup> Ntá kjuátēhe ch'ín Jesús ntáchro ch'án kixin:

—¿Xá chrókjónehya tí chojni tsík'íyēhe sín kóchjina ijnko kia tsotēhe chojni tí naxa tjejóko sín tí nkexro tsotēhe? Tí naxa tjen tí nkexro tsotēhe la xitjahya kixin chrókjónehya sín. <sup>20</sup> A ntá itsi ijnko yaon itsi chojni sátsjiko sín tí ch'ín tsíkótehe, ntá tí yaon la chaxín sinehya sín.

<sup>21</sup> Ninkexró chrókjuak'eniēhe ijnko ka ó ntaxin it'ò ka nixin kixin ntá chrókjuixéhe tí ka nixin ntá antsí má chrók'uichje tí ka ntaxin a. <sup>22</sup> La ko kjaxin ninkexró chrókuikia xran vino nixin ijnko tjuaxran ó ntaxin; kixin tí xran vino nixin la chrókótséchje tí tjuaxran ntaxin ntá chrók'uitjáyan tí xran la ko tí tjoa. Méxra tí xran vino nixin chrókuikia ijnko tjuaxran nixin —mé xikaha ichro ch'ín Jesús.

*Tí sín k'uájiko ch'ín Jesús mé ik'uín sín iso neno noatrigo ijnko yaon t'ok'éhe sín*

*(Mt. 12.1-8; Lc. 6.1-5)*

<sup>23</sup> Ijnko yaon t'ok'éhe sín na ch'ín Jesús la ko tí sín k'uájiko ch'án mé k'uátsínka sín ijnko nonte siín noatrigo. Na ntá tí sín k'uájiko ch'án kjuankixin sín ik'uín sín iso noatrigo. <sup>24</sup> Na ntá iso tí sín fariseo kjuanchankíhi sín tí ch'ín Jesús a kixin:

—¿Nkekuènté kixin tí sín xrikoa tjejóch'e sín xra ijie? Na mé kohya kjuachaxin tsonhen xra tí yaon t'ok'éheni —ichro sín.

<sup>25</sup> Ntá kjuátēhe ch'án ntáchro ch'án kixin:

—¿Á kjuinchekuáxinhyará jahará tí xroon chrónka nkehe kjuich'e ch'ín David la ko tí sín k'uájiko ch'án tí k'uén sín kjinta? <sup>26</sup> A ntá jehe ch'án k'uixenhen ch'án ntøe Dios tió kjuák'e nchat'á Abiatar k'uetoan, a ntá kjóne ch'án tí niotja tsíkóyaon kjónté jehó tí sín nchat'á mé k'uéchónta kjuachaxin sine sín la kjaxin chjéhe ch'án tí sín k'uájiko ch'án\* —ichro ch'ín Jesús.

<sup>27</sup> Kjaxin ntáchro ch'ín Jesús kixin:

—K'óna tí yaon ts'ok'éhe chojni kixin t'ichjánxin sín, la jehya kixin chrókjuikosáyehe tí yaon a. <sup>28</sup> A ntá tí Xjeen Dios K'óna Chojni mé chóna kjuachaxin ts'etoan nkehe tsonhen tí yaon t'ok'éheni —ichro ch'án.

### 3

*Ijnko chojni tsíxámá tja*  
(Mt. 12.9-14; Lc. 6.6-11)

<sup>1</sup> Ntá ch'ín Jesús k'uixenhen ch'án injnko njnko Israel inaá. Na mé ntiha tjen injnko ch'ín tsíxámá injnko tja ch'án. <sup>2</sup> Na ntá kóchjina iso chojni tsáyehe sín ch'ín Jesús ts'ikon sín kixin á sinchekitohe ch'án jína tí ch'ín tsíxámá tja tí yaon t'ok'éhe sín kixin mé jína tsjanchia sín jie, ichro sín. <sup>3</sup> Ntá ch'ín Jesús mé ntáche ch'án tí ch'ín tsíxámá tja a kixin:

—T'inkatjen, tjak'e jnkosiné ntihi —ichro ch'án.

<sup>4</sup> A ntá kjuanchankíhi ch'ín Jesús tí sín siín ntiha kixin:

—¿Nkehe siín kjuachaxin tsonhen tí yaon t'ok'éheni? ¿Á chrókjuich'eni tí jína ní o á chrókjuich'eni tí jínahya? ¿Á chrókjuinchekitoheni

\* 2:26 1 Samuel 21.1-6; Levítico 24.5-9

chojni jína ní ọ á chrók'óyánni chojni? —ichro ch'án.

A ntá jehe sín la táníkoá sín. <sup>5</sup> Na ntá ch'ín Jesús la nínkaon ch'án komá ch'án tí jehe sín la ko t'ává ch'án kixin tjinkakonhya sín tsikonóḗḗ sín chojni. Na ntá k'uetuḗnhen ch'án tí ch'ín a kixin:

—Tjéntoá tjá —ichro ch'án.

A ntá kjuéntoá ch'án tja ch'án la ó kuítóḗ tja ch'án jína. <sup>6</sup> Na ntá tí sín fariseo a k'uaxrjexín sín nínko sákjuí sín k'uíto sín tí sín kuènte ch'ín Herodes ntá kjuenkayáxinko kíchó sín kixin nkexrí chrók'óyán sín tí ch'ín Jesús.

### *Nchónhya chojni sín chrínta ntayaon*

<sup>7</sup> Ntá ch'ín Jesús la ko tí sín k'uájiko ch'án sákjuí sín chrínta ntayaon a. A ntá nchónhya chojni kjuíjichréḗ sín tsíkixín sín nó estado Galilea la ko kjaxin tsíkixín sín nó estado Judea <sup>8</sup> la ko chjasin Jerusalén la ko estado Idumea la ko ikjé sín kuixín sín nó tóḗ ntarío Jordán la ko iso sín tsíkixín sín nó chjasin Tiro la ko nó chjasin Sidón. Na mé kaín sín tsíkinhin sín kixin nkexrí tí kjuaxroan jíé kjuasin ch'ín Jesús ntá kuichréḗ sín ch'án kixin chrók'uikon sín tíha kjaxin. <sup>9</sup> Ntá k'uetuḗnhen ch'án tí sín k'uájiko ch'án a kixin ntahó chrókjuak'echonhen sín ijnko ntabárcḗ. A ntá tí imá chrók'uixitja sín ch'án ntá chrók'uixenhen ch'án tí ntabárcḗ, a ntá ntiha chrókjuak'e ch'án tsochrónka ch'án. <sup>10</sup> Kixin it-sjé chojni tsíkjinchekitoḗ ch'án jína, na ntá kaín xín tí sín níhi k'uíxitja sín ch'án kixin tjinkaon sín chrókuákóxín sín ch'án. <sup>11</sup> Kjaxin tí sín chónnta nchakuen tí jínahya na mé tió k'uíkon sín tí ch'ín

Jesús ntá k'uéjoxin sín toch'in sín nkayakon ch'án. Ntá k'óyako tí nchakuen tí jínahya a ntáchro kixin:

—Jaha mé tí Xjeen Dios.

<sup>12</sup> A ntá ch'in Jesús ntáche ch'án tí nchakuen tí jínahya kixin kohya kjuachaxin tsochrónka kixin nkexro tí jehe ch'án.

*Ch'in Jesús kjueyá ch'án teyó sín ts'ajiko ch'án*

*(Mt. 10.1-4; Lc. 6.12-16)*

<sup>13</sup> A ntá chr'éxin chriin ch'in Jesús ijnko jna, a ntá ntiha k'uíyehē ch'án tí sín tjinkaon ch'án chrók'uajiko ch'án ntá kóchjinehe sín ch'án.

<sup>14</sup> Ntá kjueyá ch'án teyó tí sín ts'ajiko ch'án kixin ts'etuenhen ch'án sín sátsji sín tsjako sín tí tan jína. <sup>15</sup> Kjuanjon ch'án kjuachaxin sinchekitohe

sín chojni níhi jína la ko tsakitsje sín nchakuen tí jínahya chóna chojni. <sup>16</sup> A ntá tí sín i mé tí teyó sín tsíkjejá ch'án mé it'in sín xikihí: Simón na mé kjuínchek'in ch'án Pedro; <sup>17</sup> la ko Jacobo la ko tí kícho ch'án Juan mé xjeen ch'in Zebedeo. Kjaxin kjuínchek'in ch'án sín Boanerges mé t'axrjexín kixin Xjeen Sítjonta. <sup>18</sup> La ko Andrés la ko Felipe la ko Bartolomé la ko Mateo la ko Tomás la ko Jacobo, it'é mé it'in Alfeo, la ko Tadeo la ko í jnko Simón tíhi mé kuente tí sín cananista, <sup>19</sup> la ko Judas Iscariote, mé kjuínchekji tí ch'in Jesús chr'éxin.

*Ntáchro sín kixin ch'in Jesús chóna kjuachaxin kuente tí Jínahya*

*(Mt. 12.22-32; Lc. 11.14-23; 12.10)*

Na ntá chr'éxin ch'in Jesús la ko tí sín k'uájiko ch'án k'uixenhen sín ijnko nchia. <sup>20</sup> A ntá inaá kójnkotsé nchónhya chojni, a ntá xitjahya sine sín.

<sup>21</sup> Ntá kónohe tí sín naxa kjéhya ch'in Jesús ntá

ikui sín sátsjiko sín ch'án kixin ntáchro sín kixin ó tsík'ixikján ch'án.

<sup>22</sup> Kjaxin tí sín tjako ti ley kuixin sín Jerusalén, ntáchro sín kixin:

—Tí ch'ín i chóna ch'án tí ch'ín Beelzebú, mé ch'ín Tsochren, mé tí nkexro t'etueñhen kaín tí nchakuen tí jínahya ntá xikaha tjacha ch'án takitsje ch'án nchakuen tí jínahya a —ichro sín.

<sup>23</sup> Ntá ch'ín Jesús k'uíyehē ch'án tí sín ntá kjuíncheyóexin ch'án ntáchro ch'án kixin:

—¿Nkexrí kixin jnkokón ch'ín Tsochren chrókuakitsje asén? <sup>24</sup> A ntá tí sín t'etoan ijnko nación tjanjonko kichó la tsjachahya ts'etoan.

<sup>25</sup> La ko kjaxin tí sín jnkokoá ntōe jnkokoáhya tjenkayáxin sín ntá xitjahya ts'ejóko kichó sín.

<sup>26</sup> A ntá tí chaxín ch'ín Tsochren jnkokónhya tjenkayáxin tjanjonko kichó la ntá ts'itjayan kjuachaxin kuente.

<sup>27</sup> Ninkexró tsjacha ts'ixenhen ntōe ijnko chojni jiehe kixin ts'axrjehe tí nkehe chóna ch'án. Náhí. T'ichjánxin saoxín sinchenteto ch'án tí ch'ín jiehe kixin jina tseéhe ch'án nkehe chóna tí ch'ín a.

<sup>28</sup> 'Ijnko nkehe chaxín tsotjonkará kixin tió tsoxraxinkaon ijnko chojni tí jie chóna la ko tsochronóehē Dios la ntá tsjakjinhin ch'án kaín tí jie la ko kaín tí nkehe jínahya tsíntáchro sín. <sup>29</sup> A ntá tí nkexro ts'ántaxinhin tí Nchakuen Dios na mé xitjahya tsjin tí jie na mé jnkochrixin tsochóna sín tí jie a —ichro ch'án.

<sup>30</sup> Mé xikaha ichro ch'án kixin tí sín a tsíntáchro sín kixin ijnko nchakuen tí jínahya mé chóna tí jehe ch'án.

*Tí ìné la ko kichó ch'ín Jesús  
(Mt. 12.46-50; Lc. 8.19-21)*

<sup>31</sup> A ntá kui ìné ch'ín Jesús la ko kichó ch'án tjejó sín ntója ó na ntá k'uetuēnhen sín ijnko chojni tsjik'íyehē ch'án. <sup>32</sup> A ntá tí sín tjejótjāxìn tí tjen ch'ín Jesús ntiha chénka sín ch'án kixin:

— Ìná la ko kichuá tjejó sín ntója xritjeyá sín ti jaha. — ichro sín.

<sup>33</sup> Ntá ntáchro ch'án kixin:

— ¿Xá nkexro tí nana la ko nkexro tí kichiná? — ichro ch'án.

<sup>34</sup> Ntá komá ch'án tí chojni tjejótjāxìn tí tjen ch'án ntá ntáchro ch'án kixin:

— Jahará mé nana la ko kichiná. <sup>35</sup> Kaín tí sín nchexiteyá tí nkehe tjinkaon Dios na mé tí sín a mé kichiná la ko nana — ichro ch'án.

## 4

*Kjuíncheyóēxin ch'án éxí ijnko chojni t'enka nonte  
(Mt. 13.1-9; Lc. 8.4-8)*

<sup>1</sup> Ch'ín Jesús mé kjuankixin ch'án kjuakoxin ch'án chrínta ntayaon ínaá. A ntá ntiha mé kójnkotsé nchónhya chojni tí tjen ch'án. Ntá ijnko ntabárcō tjenkátaón ntā k'uit'ótjen ch'án, a ntá ntaha kjuák'e ch'án kjuakoxin ch'án. Ntá kaín tí sín tsíkójnkotsé mé kuítóhe sín chrínta ntayaon k'uéjókinhin sín. <sup>2</sup> Nchónhya nkehe kjuako ch'án kjuíncheyóēxin ch'án. Ntá ntáchro ch'án kixin:

<sup>3</sup> — Tínhínrá tíhi: Ijnko chojni sákjuík'enka nontē. <sup>4</sup> Mé xíkaha sákjuík'enka ch'án iso tí noatrigo a. Ntá iso noa la tsík'ánótjen ntia ntá kui koxroxē k'uìnkā va tí noa. <sup>5</sup> A ntá iso noa na mé k'uitji chrík'á xro tí kohya ítsjé nche ntá

tjoka k'uayan kixin tjínhya chóna nche. <sup>6</sup> A ntá tió kjuítōn yaon la ntá tí ka la chján; la ko chónahya nuèe a ntá xámá. <sup>7</sup> A ntá í so noa kjuítsínkak'á tí siín kach'í la ntá tí kach'í k'uánkí la ntá tí noa í k'ónahya kixin sítja tí kach'í. <sup>8</sup> A ntá íso tí noa k'uitji nche jína la ntá k'uayan la ko k'uánkí nteto la ko k'óna jína. A ntá ijnko noa la mé k'óna treinta neno noa. A ntá í jnko la mé k'óna sesenta neno noa, a ntá í jnko la k'óna ijnko ciento neno noa —ichro ch'án.

<sup>9</sup> Ntá ntáchro ch'án kixin:

—Tí nkexro tjínkaon chrókuinhin la chrókuinhin —ichro ch'án.

*Ch'ín Jesús chronkaxín nkexrí t'axrjexín tí nkehe ntáchro ch'án*

(Mt. 13.10-17; Lc. 8.9-10)

<sup>10</sup> A ntá chr'éxin, tió kuitōhe ch'ín Jesús jehó ch'án, a ntá tí sín tjejó chjinaxón tí tjen ch'án la ko tí teyó sín k'uájiko ch'án mé kjuanchankíhi sín ch'án kixin nkexrí t'axrjexín tí nkehe kjuíncheyóxin ch'án. <sup>11</sup> Ntá ntáchro ch'án kixin:

—A ntá jahará la Dios mé sintanohará tí nkehe tienxínhya chojni kuènte tí kjuachaxin kuènte Dios, a ntá tí sín titekakonhya la ó kjuintayóaxuán kaín nkehe kuínhin sín. <sup>12</sup> Kixin kjónté ts'ikon sín la éxí k'uíkonhya sín, la ko kjónté tsinhin sín la tsienxínhya sín kixin ntá chrók'uixitoxinhya tí tjenkayáxin sín a la ko chrókjuinhinhyá tí ijje sín\* —ichro ch'án.

*Ch'ín Jesús chrónkaxín nkexrí t'axrjexín tí nkexro sákuík'enka*

(Mt. 13.18-23; Lc. 8.11-15)

---

\* 4:12 Isaías 6.9-10

13 Ntá ntáche ch'án sín kixin:

—¿Á kiénxinyará jahará nkexrí t'axrjexín tí nkehe kjuintayóaxian ní? ¿A ntá nkexrí chrókiénxinrá tí í so nkehe naxa sintayóaxian? 14 A ntá tí nkexro sákjuík'enka tí tje a mé yóhe ijnko nkexro sákjuíkjako itén Dios. 15 A ntá iso chojni la éxí tí tje kjuítsínka ntja; kixin kuínhin sín itén Dios, ntá chr'éxin ó kui ch'ín Tsochren kjuínchek'itjáyan ch'án tí tan jína kuínhin sín. 16 A ntá í so chojni la éxí yóhe tí tje kjuítsínkak'á xro: mé kuínhin sín itén Dios ntá tjoka kóxrjínhin sín kuítekaon sín. 17 Kjánchó ninkahya chóna nuè, a ntá séhya kuítóhe; a ntá itsi tí kjuaxróxinhya tsonhen sín, o tsochónkíhi sín chojni kixin tí itén Dios kuítekaon sín ntá tsítóhe sín tí tinkáchónki sín Dios. 18 A ntá í so chojni la éxí yóhe tí tje k'uínka chrík'á kach'í na mé kuínhin sín itén Dios 19 kjánchó tóxakonhen sín tí nkehe síin chjasintajni la ko tí nkehe tjete tóxrjínhin sín la ko tjinkaon sín tsochóna sín kaín xín nkehe. Kaín tíha mé t'inkákonhen tí itén Dios kuínhin sín a, la tí chojni xíkaha la xitjahya sich'ehe sín xra Dios. 20 A ntá í so chojni kuínhin tí itén Dios na kuinkáchónki sín la ntá xíkaha jína ch'ehe sín Dios xra. La iso sín la éxí yóhe tí tje k'uínka tí nonte jína k'óna treinta neno noa la ko iso sín la yóhe tí tje k'óna sesenta neno noa la ko iso sín la yóhe tí tje k'óna ciento neno noa —mé xíkaha ichro ch'ín Jesús.

*Ch'ín Jesús mé kjuíncheyóexin éxí ijnko xrohi tjeche*

*(Lc. 8.16-18)*

21 Kjaxin ntáchro ch'ín Jesús kixin:

—¿Á chrókujkaonni xrohi tjeche chrókjuak'emá chrínkí ntacajón o chrínkí cama? Kjá náhí. Tí xrohi la noi chrókjuak'e ts'inkaséyanxín. <sup>22</sup> Mé xikaha kaín tí nkehe tjejó má jie tsonoxín chr'éxin la ko kaín tí nkehe ninkexró noehya jie la tsonoxín chr'éxin. <sup>23</sup> A ntá tí nkexro tjinkaon chrókuinhin la chrókuinhin tíhi —ichro ch'án.

<sup>24</sup> Kjaxin ntáchro ch'án kixin:

—Chrókjuenkayáxinrá jína tí nkehe tjejótinhrá. Tí nkehe tjáchoayará jahará la Dios la kjaxin tíha tsjáchoayá ch'án tí nkehe ts'ayéhérá jahará, a ntá antsí má ts'ayéhéra tí jahará tjejontinhrá. <sup>25</sup> A ntá tí nkexro chóna nkehe la antsí má ts'áyéhe sín. A ntá tí nkexro chónahya la kjónté tí ntsí chóna la ts'axrjehe —ichro ch'án.

*Ch'ín Jesús mé kjuíncheyóxin ch'án éxi ijnko tje ts'ayan ts'ánkí*

<sup>26</sup> Kjaxin ntáchro ch'ín Jesús kixin:

—Tí kjuachaxin t'etōan Dios tóyóhe ijnko chojni sátsjik'enka nonte. <sup>27</sup> Ntá sákjuik'ajua ch'án tí tie la ko k'uàya ch'án tí nchítjen. A ntá xikahó k'uátsínka iso yaon la ko iso tie, a ntá tí tje la k'uayan la k'uánkí. A ntá tí nkexro k'uēnka la noehya ch'án nkexrí kónhen tíha. <sup>28</sup> A ntá tí nche mé kjuích'e xra jehó. Senó k'uayan tí chaon tí ka, a ntá kjuinta, a ntá chr'éxin icha tí noa tsjinjin; <sup>29</sup> a ntá tió tsícha tí noa, a ntá tsakjinjin sín tí noa kixin ó kjuixraká tí yaon tsotjá sín.

*Ch'ín Jesús kjuíncheyóxin ch'án éxi ijnko tje it'in mostaza*

(Mt. 13.31-32; Lc. 13.18-19)

<sup>30</sup> Kjaxin ntáchro ch'ín Jesús kixin:

—¿Nkehe chrókóyóhē tí kjuachaxin t'etōan Dios, nkehe chrókóyóexin tíha? <sup>31</sup> Mé éxí yóhē tí tje it'in mostaza tsík'inka nonte. Tíha mé ijnko tje imá ntsí, a ntá tí í so tje síin chjasintajni la kénhyó. <sup>32</sup> A ntá jnkonaá tsík'inka tí tje la tsík'ayan tsík'ánkí imá ihyé, a ntá tí í so nta la kánhyó. A ntá kjaxin tí chaon tí nta tsík'ánkí imá ihyé, a ntá kjónté koxroxé xritjaka la jína ts'ok'éhe va chrínkí tí ts'van chaon tí nta.

*Nkehe tí xrq̄ kjuích'e tí nkehe kjuíncheyóexin ch'ín Jesús*

*(Mt. 13.34-35)*

<sup>33</sup> Mé xíkaha ch'ín Jesús kjuakohē ch'án tí jehe sín, kjuíncheyóexin ch'án nchónhya nkehe éxí tí nkehe a kixin chrókjuacha chrókienxín sín tíha. <sup>34</sup> Kaínxín nkehe kjuakohē ch'án tí jehe sín la kjuíncheyóexin ch'án. A ntá jehó tí sín k'uájiko ch'án la chrónka ch'án nkexrí t'axrjexín kaín tí nkehe kjuíncheyóexin ch'án.

*Ch'ín Jesús k'uetuēnhen ch'án tí xr̄ntō la ko tí nta síchrica k̄ixin ts'ixita*

*(Mt. 8.23-27; Lc. 8.22-25)*

<sup>35</sup> A ntá tí yaon a la ntá ó kóntó ntá ntáche ch'ín Jesús tí sín k'uájiko ch'án a kixin:

—Sátsjini tóhe tí ntayaon —ichro ch'án.

<sup>36</sup> Ntá kuítóhe sín kaín tí chojni a ntá sákjuíko sín tí ch'ín Jesús naxa tjenkáya ch'án tí ntabárcō la ko kjaxin í so ntabárcō sákjuí koí. <sup>37</sup> Ntá xrínahya tj̄ian chjéhe xr̄ntō la ntá síchrica nt̄a t'ixenhen tí ntabárcō, ó mero tsokaón nt̄a tí ntabárcō. <sup>38</sup> A ntá ch'ín Jesús na mé tjejua ch'án tí tjar'i nóton tí tjejó

sín nkaxenhen tí ntabárc̣o a tjejkjón ch'án ijnko ka. Na ntá kjuínchekjàȳa sín ch'án ntáchro sín kixin:

—¡Maestro! ¿Á ntosán kixin ts'itjáyanni, ts'aniánkíni nta ní? —ichro sín.

<sup>39</sup> A ntá ch'ín Jesús k'uàya ch'án, k'uetuēhen ch'án tí xr̄into la ko tí nta kixin ts'ixita, ntáchro ch'án kixin:

—Tániá, tjak'eta —ichro ch'án.

Na ntá tí xr̄into la ko tí nta k'uíxratá. <sup>40</sup> Ntá kjuanchankíhi ch'án tí sín k'uájiko ch'án ntáchro ch'án kixin:

—¿Nkekuèté kixin imá chrakonrá? ¿Á naxa tinkachónkihyará Dios? —ichro ch'án.

<sup>41</sup> Ntá imá chrakon sín ntá kjo sín kichó sín kixin:

—¿Xá nkexro tíhi? Kjónté xr̄into la ko ntayaon la mé kjuínchexiteyéhe ch'án —ichro sín.

## 5

*Ijnko chojni chón̄ta nchón̄hya nchak̄uen tí jín̄ahya nonte Gadara*

*(Mt. 8.28-34; Lc. 8.26-39)*

<sup>1</sup> Ntá tió k'uátòye sín tí ntayaon, a ntá kjuíji sín tí nonte Gadara. <sup>2</sup> Ntá k'uínkajinx̄in ch'ín Jesús tí ntabárc̣o a. Ntá xrín̄ahya xeta ch'án ijnko ch'ín kuix̄in nó tsík̄jixravá chojni mé chón̄ta ch'án ijnko nchak̄uen tí jín̄ahya. <sup>3</sup> Tí ch'ín a mé kjuák'e ch'án tí tsík̄jixravá chojni. Ninkexró tjachahya sinchenteto ch'án kjónté cadena tjachahya. <sup>4</sup> Nchón̄hya veces kjuínchentetoxín sín ch'án cadena toté ch'án la ko itja ch'án, la kjónté kóchr̄iton ch'án kjuínchekuen ch'án tí cadena. Kohya ninkexro tjacha ts'etuenhen tí jehe ch'án. <sup>5</sup> K'uék'aji ch'án nchak̄otjin la ko tie t'íyato ch'án nó jn̄a la ko tí

tsíkji<sub>x</sub>ravá chojni la ko chjéhe asén ch'án xro. <sup>6</sup> Na ntá k'uíkon ch'án kixin kui ch'ín Jesús kjónté ikjín la kuinká ch'án kjuíji ch'án kjuák'exín toch'in ch'án nkayakon ch'ín Jesús a <sup>7</sup> k'óyako ch'án ntáchro ch'án kixin:

—¿Nkekuènté tjiaté jaha tí jeheni, jaha Jesús Xjeen Dios tjen nkaya nkajní? Dios nchenoheni kixin xrjanóaha nchekjasótehyani —ichro ch'án.

<sup>8</sup> Mé xikaha ichro ch'án kixin tsintáchro ch'ín Jesús kixin:

—Jaha nchakuen tí jínahya, tìtohé tí ch'ín i —ichro ch'án.

<sup>9</sup> Ntá ch'ín Jesús mé kjuanchankíhi ch'án tí ch'ín a kixin:

—¿Nkexrí it'ian? —ichro ch'án.

Ntá kjuátèhe ch'án ntáchro ch'án kixin:

—Legión mé it'inni kixin nchónhyani —ichro ch'án.

<sup>10</sup> Ntá imá chrónóèhe ch'án tí ch'ín Jesús kixin tsochr'ánhya ch'án ókjé tí nchakuen tí jínahya. <sup>11</sup> Na ntá síin nchónhya cochíno xrine va chjinaxón tí jnā ntiha. <sup>12</sup> A ntá chrónòà tí nchakuen tí jínahya ntáchro kixin:

—Tétuènhènni sátsjini tí síin tí cochíno, tìtohé ts'ixenhenni tí jehe va —ichro tí nchakuen tí jínahya a.

<sup>13</sup> Ntá ch'ín Jesús mé kjuanjon ch'án kjuachaxin. Ntá kaín xín tí nchakuen tí jínahya a mé k'uaxrjexín tí ch'ín a sákjuí kjuík'ixenhen tí cochíno a. Na ntá kaín xín tí ko a mé chjina iyó mil va síin va xrine va. Na mé kaín xín va k'uínkajinxin va ntiha kjuítsínkayá va tsaka ntá kjuítsínkankí va ntayaon ntá kjuínhin va ntā.

14 Na ntá tí chojni t'ayakonhen tí cochíno a na mé kuinká sín kixin chrakon sín na ntá sákjuí chrónka sín chjasén sín la ko nontee chojni. Na ntá itsjé chojni mé kuitsjehe sín nkehe tí tsíkónhen ntiha.

15 Ntá kjuíji sín tí tjen ch'ín Jesús a na k'uíkon sín kixin itjen tí ch'ín k'uéchónta tí nchónhya nchakuen tí jínahya senó la ó jína tjen ch'án tjetjaxin ch'án tjenkáya ch'án iké ch'án, na ntá chrakon sín. 16 A ntá tí sín tsík'ikon mé chrónka sín nkexrí k'uék'aji tí ch'ín k'uéchónta tí nchakuen tí jínahya la ko nkexrí kónhen tí cochíno a. 17 Ntá kjuankíxin sín chrónóehé sín tí ch'ín Jesús a kixin sáchrókjuixin ch'án ntiha.

18 A ntá ó ts'it'ótjen ch'ín Jesús tí ntabárcɔ na ntá tí ch'ín k'uéchónta nchakuen tí jínahya na mé chrónɔa ch'án kixin kjaxin ch'án sáchrókjuiko sín ch'án, ichro ch'án. 19 Ntá ch'ín Jesús kjuanjonhya ch'án kjuachaxin sátsjiko sín ch'án. Náhí. K'uetɔan ch'án kixin:

—Sátjia ntoa tjíchenka tí sín naxa kjéhya tí jaha kixin nkexrí kaín tí kjuaxroan jié kjuasin Dios kjuínchekitɔha jína kuíkonóaha ch'án tí jaha —ichro ch'án.

20 Na ntá tí ch'ín a sákjuí ch'án kjuankíxin chrónka ch'án kaín tí chjasin kuènte Decápolis kixin nkexrí kaín tí nkehe kjuích'e ch'ín Jesús kjuínchekitɔhe ch'án jína. A ntá kaín tí sín kuínhin na chrakon sín.

*Tí xjeen ch'ín Jairo la ko tí tjan kuákóxin iké ch'ín Jesús*

*(Mt. 9.18-26; Lc. 8.40-56)*

21 Ntá tió xíkjankao ch'ín Jesús tí ntabárcɔ tóhe tí ntayaon ínaá ntá kóchjina nchónhya chojni ntá ntahó chrínta ntá kuítɔhe ch'án ínaá. 22 Na ntá

ikui ijnko ch'ín t'et̄oan kuènte n̄jnko mé it'in ch'án Jairo. A ntá tió k'uíkon ch'án kíxin itjen ch'ín Jesús ntá kjuák'exín toch'in ch'án chrínkí toté ch'ín Jesús a <sup>23</sup> imá chrónóḡeḡe ch'án kíxin:

—Tí ijnko xjanna chjin ó tjet'en xjan. Xrjanóaha chrókjuini chrókjuak'étja itjá chrítaón kja xjan ntá chrókuitoḡe xjan jína —ichro ch'án.

<sup>24</sup> Ntá ch'ín Jesús sákjuiko tí ch'ín a. Na nchónhya chojni chréḡe sín tinkák'ixitja sín ch'án ínaá. <sup>25</sup> A ntá kjaxin tjenkákjan sín ijnko chojni chjin níhi tjan, ó chóna teyó nánó sítji tjan jni. <sup>26</sup> Imá tjote tjan kíxin nchónhya chojni kjuanjon xroan kónhen tjan na ó kjuixin kjuèhe tjan kaín xín nkehe k'uéchóna tjan. Ó jehí titōehya tjan jína la íchá ntsí tinkákótao tjan. <sup>27</sup> A ntá tió kuínhin tjan chrónka chojni nkehe tí kjuaxroan kjuasin ch'ín Jesús ntá kui tjan kjuák'enkákjan tí chojni kóchjina nóton ch'ín Jesús ntá kuákóxin tjan tí ké ch'án, <sup>28</sup> ntáchro tjan kíxin kjónté iké ch'án ó chrókuakóxin tjan na ó tíhó mé chrókuitoḡe tjan jína, ichro tjan. <sup>29</sup> Ntá tuénxín tí jni na mé ó kjuixié tjan la ko kónohe tjan kíxin ó kjuixin kuítóḡe tjan jína ti chin k'uéchóna tjan. <sup>30</sup> Ntá ch'ín Jesús na ó kónohe ch'án kíxin kjuachaxién ch'án mé kuítóexín ijnko chojni jína ntá kuinkátjía ch'án kjuanchankíhi ch'án tí chojni síin a kíxin:

—¿Nkexro kuákóxin tí kaná? —ichro ch'án.

<sup>31</sup> Ntá kjuátēhe tí sín k'uajiko ch'án a ntáchro sín kíxin:

—Ó noha kíxin nchónhya chojni sítja, ¿ntá nkekuèté kíxin naxá tjanchankiá kíxin nkexro tí kuákóxian? —ichro sín.

<sup>32</sup> Ntá kuinkátjía ch'án tsjehe ch'án nkuíxín kixin tsonohe ch'án nkexro tí kuákóxín tí ké ch'án. <sup>33</sup> Ntá tí tjan a na mé chrakon tjan síxrànka tjan ó nohe tjan kixin ó kuítóhe tjan jína ntá xrakoa tjan kjuák'exín toch'in tjan nkayakon ch'in Jesús ntá ntoá chrónka tjan kaín nkehe kónhen tjan. <sup>34</sup> Ntá ntáchro ch'in Jesús kixin:

—Xjeenni, kaín asán kuinkachónkia tí janhan ntá kuítóha jína. Ijie la kjuaxróxin sátsjia ntoa la ó kuítóha jína a —ichro ch'án.

<sup>35</sup> Na ntá naxa tjenixja ch'án ntá ó kui chojni kuixín sín ntøe tí ch'in t'etøan tí nínko. Ntá chénka sín ch'án kixin:

—Xjaan na ó kjuixin k'uén. ¿Nkekuèté naxa chjehé xrā tí Maestro a? —ichro sín.

<sup>36</sup> Ntá ch'in Jesús na ántosén ch'án tí chrónka sín ntá nixjehe ch'án tí ch'in t'etøan tí nínko ntáchro ch'án kixin:

—Chrakonhya jaha, jehó tsinkachónke tí janhan —ichro ch'án.

<sup>37</sup> Ntá kjuanjonhya ch'án kjuachaxin kixin sátsji kaín sín, na ó jehó ch'in Pedro la ko ch'in Jacobo la ko ch'in Juan mé kichó ch'in Jacobo, sátsji sín. <sup>38</sup> Na ntá tió kjuíji sín tí ntøe tí ch'in t'etøan tí nínko na k'uíkon sín kixin imá sítjité sín tsjánkàma sín tí xjan a. <sup>39</sup> Ntá k'uíxenhén ch'in Jesús nchia kjuanchankí ch'án kixin:

—¿Nkekuèté ánta tjasitérá tsjánkàmará tí xjan a? Tí xjan na tsík'enhya xjan na tjejua xjan —ichro ch'án.

<sup>40</sup> A ntá kjuanoá sín ch'án. Ntá k'ueøan ch'án kixin kaín sín sátsji sín ntója. Ntá kjuíko ch'án tí it'é la ko tí ìné xjan la ko tí iy'á sín xriko ch'án ntá

k'uíxenko sín ch'án tí tjen tí xjan a. <sup>41</sup> Itsé ch'án tja xjan ntá nkívee xjan mé nixjeexín ch'án ntáchro ch'án kixin:

—Talita, cumi —mé t'axrjexín kixin: Lonchí, tétuanhan kixin t'àya.

<sup>42</sup> A ntá tí xjan a ó chóna tjan teyó nánó na mé tuénxín k'uínkatjen tjan ó jína tji tjan. Ntá kaín tí chojni síin ntiha la chrakon sín k'uíkon sín xikaha. <sup>43</sup> Ntá fuerte k'uetōan ch'ín Jesús kixin chróchenkahya sín ninkexró. La kjaxin k'uetōan ch'án kixin tsjanjon sín nkehe sine tjan.

## 6

### *Ch'ín Jesús kjuák'e ch'án chjasin Nazaret (Mt. 13.53-58; Lc. 4.16-30)*

<sup>1</sup> A ntá chr'éxin k'uaxrjexín ch'án chjasin ntiha. Ntá jehe ch'án la ko tí sín k'uájiko ch'án na mé sákjuí sín Nazaret tí chjasin tsík'ánkixin ch'án. <sup>2</sup> Na ntá tió kui tí yaon t'ok'éhe sín ntá kjuankixin ch'án kjuakoxin ch'án tí ninko ntiha. Na ntá nchónhya chojni kuínhin sín ntá chrakon sín ntáchro sín kixin:

—¿Nketí tsíxrakohē tí ch'ín i kaín tíhi? ¿Nketí kuixin tí kjuaxrexinkaon chóna ch'án la ko tí kjuaxroan tjasin ch'án? <sup>3</sup> ¿Á jehya ch'án tí ch'ín ch'éna nta na mé xjeen tí tjan María, la tí kichó ch'án a na mé ch'ín Jacobo, la ch'ín José, la ch'ín Judas, la ch'ín Simón? ¿A kjaxinhya ntihi tjejókoni tí kichó ch'án chjin? —ichro sín.

Méxrā tahya sín kuentá nkerí ch'e ch'án. <sup>4</sup> Na ntá ntáchro ch'ín Jesús kixin:

—Kaín chojni tjikosáyehe sín ijnko nkexro chrónka iten Dios. Ntá tí chjasén ch'án la ko kaín

tí sín kjéhya ch'án la ko tí sín ntøe ch'án na mé tjikosáyehya sín ch'án —ichro ch'án.

<sup>5</sup> Méxra ninkehó kjuaxroan xitjahya kjuasin ch'án ntiha, la jehó kjuak'etja tja ch'án chrítaón ikja iso chojni níhi kjuínchekitohe ch'án sín jína.

<sup>6</sup> Ntá chrakon ch'án kixin xikaha kuítekakuenhya sín ch'án. Na ntá k'uáji ch'án tí chjasin ntsínsí chjinaxón ntiha kjuako ch'án.

*Ch'ín Jesús mé ichr'án tí teyó sín kixin sátsji sín tsjikjako sín itén Dios*

*(Mt. 10.5-15; Lc. 9.1-6)*

<sup>7</sup> Na ntá k'uíyehē ch'ín Jesús tí teyó sín k'uajiko ch'án a. Ntá kjuankíxin k'uētuenhen ch'án kixin yóyó yóyó sín sátsji sín la ko kjaxin kjuanjon ch'án kjuachaxin kixin tsakitsje sín nchakuen tí jínahya chóna chojni. <sup>8</sup> La ko k'uētøan ch'án kixin ninkehó tsjikohya sín kuènte ntja. Jehó tí nta tjixin sín mé tsjiko sín. Na mé tsjikohya sín kabolsa la ko tsjikohya sín nkehe sine sín la ko tsjikohya sín chichaon. <sup>9</sup> Na ko tokate ó tsjanka sín la ko tsjiko sín jehó tí ka tjejóya sín ó. <sup>10</sup> Kjaxin ntáchro ch'án kixin:

—A ntá tí ts'ixenhénrá ijnko nchia a ntá ntaha tsjanjon sín kjuachaxin na ntahó chókuítóhará. A ntá tsjixinjian tí xra ntá sátsjixinrá ntiha. <sup>11</sup> Na ntá tí tsjasánrá ijnko chjasin ntá tsochrohya sín tsjanjon sín kjuachaxin ts'ejókoará sín ntiha na ko tsotjinkakonhya sín tsinhin sín tí nkehe chrókjuákohérá sín na ntá t'axrjéxinrá tí chjasin a ntá ts'oxènjínrá tí nche chóna totárá kixin xikaha tsjakoxinrá kixin ntoáhya kjuích'e tí jehe sín. A ntá chaxín ntáxrjan kixin tí yaon tsitøexín ijié chojni

ntá antsí má tsjasóte tí chojni tí chjasin a, a ntá tí sín chjasin Sodoma la ko Gomorra la kánhyó tsjasóte sín.

<sup>12</sup> Na ntá sákjuí sín kuinkákjakohe sín tí chojni a kixin mé chrókjuitóxinhin sín ntje sín. <sup>13</sup> La ko kjaxin kuakitsje sín itsjé tí nchakuen tí jínahya chóna chojni. Na ko aceite mé kujkite sín itsjé chojni níhi a la ntá kuítóhe sín jína.

*Ik'uén ch'ín Juan Bautista*

*(Mt. 14.1-12; Lc. 9.7-9)*

<sup>14</sup> Na ntá tí ch'ín rey Herodes mé kuínhin ch'án nkehe tí kjuaxroan kjuasin ch'ín Jesús. Na ntáchro ch'ín Herodes kixin:

—Kjá tí ch'ín Juan Bautista mé ó tsíxechón ch'án inaá kixin xikaha tí kjuachaxin chóna tí ch'ín a —ichro ch'ín Herodes a.

<sup>15</sup> A ntá iso sín ntáchro sín kixin:

—Kjá ch'ín Elías k'uéchrónka itén Dios —ichro sín.

A ntá í so sín mé ntáchro sín kixin:

—Kjá ijnko nkexro yóhe tí sín k'uékjako itén Dios ósé —ichro sín.

<sup>16</sup> Ntá kuínhin ch'ín Herodes tíha ntá ntáchro ch'án kixin:

—Kjá ó jehe tí ch'ín Juan tí kuétoan chrínjin kja ch'án, mé ó tsíxechón ch'án jie —ichro ch'án.

<sup>17</sup> Méxra tí ch'ín Herodes mé tsík'etoan ch'án kixin tsontetoxín tí ch'ín Juan cadena tsjak'echjina ch'án kixin xikaha tsíkjanhia tí tjan Herodías. A ntá tí tjan Herodías k'uéchjién tí ch'ín Felipe. A ntá tí savé ch'án Herodes mé kuákja tí tjan a kixin ts'óna ichjién ch'án. <sup>18</sup> A ntá tí ch'ín Juan tsintáche ch'án tí ch'ín Herodes kixin:

—Kohya kjuachaxin tsochonta tí ichjién tí kíchuá —ichro ch'án.

<sup>19</sup> Mé xikaha tí tjan Herodías mé imá kónínkakonhen tjan tí ch'ín Juan ntá chrók'óyán tjan ch'án, kjánchó xitjahya <sup>20</sup> kixin tí ch'ín Herodes mé chrakonhen ch'án tí ch'ín Juan kixin ó nohe ch'án kixin tí ch'ín a mé ijnko nkexro jína la ko tjóá asén la méxra kuítóehya ch'án kixin jehe tjan chrók'óyán tjan ch'án. A ntá kénhyó kienxín ch'án la kjónté kóxrjínhin ch'án tí nkehe kuínhin ch'án kjuako ch'ín Juan. <sup>21</sup> A ntá tí tjan Herodías mé kjuacha tjan tí yaon kia síkjitoxinhin nánó tí ch'ín Herodes a kixin tsík'íyehé ch'án tí síxreé la ko tí sín k'uetuēnhen tí sín soldado la ko tí sín t'etoan estado Galilea kixin itsi sín ntə ch'án kixin síin kia. <sup>22</sup> A ntá tí xjeen tí tjan Herodías mé k'uixenhen tí tjejó sín, a ntá ité tjan, la kóxrjínhin ch'ín Herodes la ko kaín tí sín tjejóneko ch'án ntiha. Na ntá tí ch'ín rey ntáche ch'án tí tjan tjarisoá a kixin:

—Tjanhana tí nkehe tjinkávan na tsotjahá —ichro ch'án.

<sup>23</sup> Ntá kjuínchenohe ch'án Dios ntáchro ch'án kixin tsjanjon ch'án tí nkehe tsjanchia tjan kjónté jnkosiné tí chjasin t'etoan ch'án. <sup>24</sup> Ntá jehe tjan na mé kuínhin tjan ntá sákjuí tjan chénka tjan ìné tjan kixin tsintáchro ch'ín Herodes kixin tí ichrén nkehe chrókjuanchia tjan chrókjuanjon ch'án. Ntá kjuanchankí tjan kixin:

—¿Nkehe tí chrókjuanchiani? —ichro tjan.

Ntá tí ìné tjan mé ntáchro kixin:

—Ijie la itjia tjanchia tí kja tí ch'ín Juan Bautista, ichrua —ichro tjan.

25 A ntá tí tjarisoá ikjan tjan tjoka k'uúixenhen tjan tí tjen tí ch'ín rey, ntá ntáchro tjan kixin:

—A ntá ijie tjinkaonni ijnko plato tsjak'enkáya ikja ch'ín Juan Bautista tsochjehéni —ichro tjan.

26 Na ntá tí ch'ín rey la mé imá k'uává ch'án kixin xikaha kjuanchia tjan kjánchó tsíkjinchenohe ch'án Dios la ko tsíkinhin kaín tí sín tsík'íyehé ch'án, la ntá xitjahya tsontáchro ch'án “Náhi” tí nkehe kjuanchia tjan. 27 Na ntá tuénxín k'uetuēnhen ch'án ijnko ch'ín soldado kixin tsjikao ch'án tí kja ch'ín Juan a. 28 Ntá tí ch'ín soldado mé sákjuí ntōechiso, ntá kóchrínjin ch'án ikja tí ch'ín Juan a. Ntá ijnko plato kjuikoyá ch'án tí kja ch'án a ntá chjéhe ch'án tí tjan tjarisoá a. Ntá jehe tjan sákjuíkénhen tjan ìné tjan.

29 Na ntá kuínhin kaín tí sín k'uék'ajiko ch'ín Juan kixin xikaha tsíkónhen. Na ntá sákjuíkakja sín tí cuérpōe ch'án ntá kjuikao sín ntá sákjuíkjavá sín.

*Ch'ín Jesús mé kjuanjon nkehe kjóne in'ó mil chojni*

*(Mt. 14.13-21; Lc. 9.10-17; Jn. 6.1-14)*

30 A ntá chr'éxin tí sín k'uájiko ch'ín Jesús a na mé ó kjan sín tí tjen ch'án inaá, chrónka sín nkexrí tí xra kjuích'e sín na ko nkexrí kjuako sín. 31 A ntá ntáchro ch'ín Jesús kixin:

—Ts'axrjentani sátsjini nteje tí kohya chojni ntá ts'ok'áhará ntsí —ichro ch'án.

Mé xikaha ntáchro ch'án kixin sásítji la ko síti nchónhya chojni na ntá xrankahya ts'ejó sín sine sín. 32 Na ntá ch'ín Jesús la ko tí sín k'uájiko ch'án jehó sín k'uit'ótjen sín ijnko ntabárco sákjuí sín ijnko nonte jehó tjen. 33 Na ntá itsjé chojni k'uikon

sín ḱixin sákjuí sín la ko kjuátsoan sín ḱixin ch'ín Jesús. Ntá xrákuaxín sín chjasén sín kuinká sín na ntá senó kjuíji sín tí chrínta ntayaon tí tsjiji ch'ín Jesús. <sup>34</sup> Ntá k'uínkajinxín ch'án tí ntabárcō, a ntá k'uikon ch'án ḱixin nchónhya chojni siín ntiha ntá kuikonóehē ch'án tí jehe sín na mé éxí yóhē kolélo tjejó sín chóntahya va nkexro ts'ayakonhen va. Ntá kjuanḱixin ch'án kjuakohē ch'án sín nchónhya nkehe a. <sup>35</sup> Na ntá ó kóntó na ntá tí sín k'uájiko ch'ín Jesús a mé kóchjina sín tí tjen ch'án ntáchro sín ḱixin:

—Ntá ó kóntó la kohya ninkexró tjejó ntihi <sup>36</sup> na ntá jaha chrókujtohé sín ḱixin sátsji sín tí chjasin chjinaxón a tsjik'ena sín nkehe ḱixin chóntahya sín nkehe sine sín —ichro sín.

<sup>37</sup> A ntá ch'ín Jesús kjuátehe ch'án ntáchro ch'án ḱixin:

—Chjehé sín nkehe sine sín —ichro ch'án.

Ntá kjuátehe sín ntáchro sín ḱixin:

—¿Á tsjik'enani iyó ciento denario niotja tsochjéheni sín sine sín ní? —ichro sín.

<sup>38</sup> Ntá ch'ín Jesús mé kjuanchankíhi ch'án sín ḱixin:

—¿Nkekjaín niotja chontará? Sátjítsehérá —ichro ch'án.

Ntá sákjuítsjehe sín na ntá chrónka sín ḱixin:

—In'ó niotja la ko yaá koche mé siín —ichro sín.

<sup>39</sup> Na ntá k'uetōan ch'án ḱixin kaín xín sín chrók'uixitjaxín sín tí chrítaón tí ka yoa a. <sup>40</sup> Na ntá xikaha kójnkojié sín ciento sín la ko cincuenta sín k'uixitjaxín sín. <sup>41</sup> Na ntá ch'ín Jesús kuákja ch'án tí in'ó niotja na ko tí yaá koche ntá konta ch'án nkajní ntá kjuanchia ch'án kjuasáyé Dios. Na ntá kóchrít'ō ch'án tot'ō tí niotja a ntá chjéhe ch'án tí

sín k'uájiko ch'án kixin ts'óxikayehe sín sine tí sín siín a la ko kjaxin kóchrít'ò ch'án tí yaá koche ntá k'óxikayehe sín kixin sine sín kaín sín. <sup>42</sup> Ntá kaín xín sín kjóne sín kókjehe sín. <sup>43</sup> A ntá kjuixin kjóne sín ntá tí sín k'uájiko ch'ín Jesús na mé kjuínchekaón sín teyó ntaxra tot'ò tí niotja la ko tí koche tsíxehe. <sup>44</sup> A ntá tí sín kjóne na mé in'ó mil chojni ntoa.

*Ch'ín Jesús mé tjitaón ntayaon*

*(Mt. 14.22-27; Jn. 6.16-21)*

<sup>45</sup> A ntá tuénxín k'uētuenhen ch'ín Jesús tí sín k'uájiko ch'án kixin ts'ít'ótjen sín tí ntabárcò a ts'atòye sín ntayaon sátsji sín nó chjasin Betsaida, ichro ch'án. Na ntá jehe ch'án na mé naxa kuítóhe ch'án nixjehe ch'án kaín tí sín siín a. <sup>46</sup> Kjuixin nixjehe ch'án sín na ntá jehe ch'án chrìn ch'án ijnko jnā tsonixjeexín ch'án Dios. <sup>47</sup> A ntá tió k'uixin tie ntá tí ntabárcò na mé ó kjuíji jnkosiné ntayaon, a ntá jehe ch'án jehó ch'án kjuíji ch'án chrínta ntayaon. <sup>48</sup> Ntá kotohe ch'án k'uíkon ch'án kixin imá xra tjiko sín tí ntabárcò a kixin tí xrinto imá chjéhe. Nantóye a mé sákjuíchréhe ch'án sín. Totó ch'án mé sákjuítónxin ch'án tí ntayaon na ntá kóchjinehe ch'án tí tjejó sín chrók'uátsínké ch'án sáchrókjui ch'án. <sup>49</sup> A ntá tí k'uíkon sín kjuítaón ch'án ntā, ntá kjuenkayáxin sín kixin kjuacha sín, ichro sín, ntá k'óyako sín <sup>50</sup> kixin kaín sín k'uíkon sín ch'án la chrakon sín. Na ntá jehe ch'án mé tuénxín nixja ch'án ntáchro ch'án kixin:

—Chrakonhyará. Janhan tíhi —ichro ch'án.

<sup>51</sup> Ntá k'uit'ótjen ch'án tí ntabárcò tí tjejó sín, a ntá tí xrinto la ó k'uíxratá. Ntá imá chrakon sín kixin xikaha kónhen <sup>52</sup> kixin kienxínhya sín tí kjuaxroan

kjuích'e ch'án kuènte tí niotj̄a kixin nax̄a kénhya  
asén sín kuinkáchónki sín ch'án.

*Ch'ín Jesús mé kjuínchekitohe jína tí chojni níhi tí  
nonte Genesaret  
(Mt. 14.34-36)*

<sup>53</sup> Ntá tió k'uátòye sín tí ntayaon ntá kjuíji sín tí  
nonte Genesaret ntá kjuak'echrōe sín tí ntabárōo  
a tí chrínta nta. <sup>54</sup> Na ntá tió k'uínkajin̄xin sín tí  
ntabárōo, a ntá tí sín siín ntiha tjoka kjuátsoan  
sín tí ch'ín Jesús. <sup>55</sup> Ntá sákjuí sín nkuíxín chji-  
naxón ntiha kjuankíxin sín kuik̄ao sín tí s̄inníhi  
tinkátsénkí sín kuik̄ao sín tí tjen ch'ín Jesús. <sup>56</sup> La  
ko kaín nketí kjuíji ch'án, á chjasin ntsí, á chjasin  
hyé, á nontee sín ó kjuíjiko sín tí s̄inníhi a chrínta  
nt̄ia. Na ntá chrónóehe sín tí ch'ín Jesús kixin kjónté  
chrínta iké ch'án ó chrókuákóxin sín, ichro sín. Na  
kaín xín tí sín kuákóxin iké ch'án mé kuítóhe sín  
jína.

## 7

*Tí nkehe nchekjita asén chojni  
(Mt. 15.1-20)*

<sup>1</sup> A ntá iso sín fariseo la ko iso tí sín tjako tí ley  
kuix̄in sín chjasin Jerusalén ntá kóchjinehe sín tí  
ch'ín Jesús. <sup>2</sup> Tí sín a, tió k'uíkon sín kixin iso tí  
sín k'uájiko ch'ín Jesús mé k'óntihya sín tja sín na  
kjónté ine sín mé t'axrjexín kixin kjuínchexiteyáhya  
sín tí ley, ntá kjonta tí sín a. <sup>3</sup> (Mé xikaha kjuích'e  
sín kixin tí sín fariseo la ko kaín tí sín judío mé  
kuinkáchónki sín éxi k'uékjich'e tí sín táda ósé kixin  
ná t'òntó itja sín ntá sine sín. <sup>4</sup> Na ko tí tsokjan̄xin  
sín nta sin ná t'ónti sín ntá sine sín. Na ko kjaxin

itsjé í so nkehe tinkáchónki sín, éxí tjonemá sín tí vaso t'iyá sín nkehe la ko tí nchésen la ko tí chī chjányan nkehe ne sín la ko tí kámé sín nchetjóá sín.) <sup>5</sup> Méxra tí sín fariseo la ko tí sín maestro tjako tí ley a na mé kjuanchankíhi sín tí ch'ín Jesús kixin:

—¿Nkekuèté kixin tí sín xrikoa la nchexiteyáhya sín tí nkehe k'uékinkáchónki tí sín táda k'uéjé ósé? Na mé tí sín xrikoa t'óntihya sín tja sín ntá kjónté ine sín —ichro sín.

<sup>6</sup> Kjuátehe ch'ín Jesús ntáchro ch'án kixin:

—Ntoá tsíchrónka ch'ín Isaías ósé k'uéchrónka iten Dios tsíntáchro ch'án kixin ntoáhya tsjenkayáxinrá tí jahará kixin xíkíhi tsíkjin ch'án ntáchro ch'án kixin:

Tí chojni tí chjasin i ir'va ó xraxinkakonxín sín tí janhan,

a ntá tí asén sín ikjín kuítóhe sín tí janhan

<sup>7</sup> Méxra ó chónkó tóchjina sín xraxinkaon sín tí janhan,

kixin tí nkehe tjako sín la tí nkehe tsík'etōan chojni ó.\*

Mé xíkaha ichro itén Dios. <sup>8</sup> Ntá jahará kuítóhérá tí nkehe tsík'etōan Dios ntá chréhérá tí nkehe ch'e chojni, a lá mé tjonemará nchésen, la ko tí vaso t'íará nkehe, la ko kjaxin í so nkehe yóhe tinkachónkirá —ichro ch'án.

<sup>9</sup> Kjaxin ntáchro ch'án kixin:

—Jahará chréhérá tí nkehe k'uékjich'e chojni ntá xíkaha títóhérá ntáha tí nkehe tsík'etōan Dios.

<sup>10</sup> Tsíntáchro ch'ín Moisés kixin: “Tsochonteherá kjuasáyé it'ará la ko inará”, la ko “A ntá tí nkexro t'ántaxínhin it'é o iné la chrók'óyán sín.”† <sup>11</sup> A

\* **7:7** Isaías 29.13 † **7:10** Éxodo 20.12; 21.17

ntá jahará ntáchrórá kixin ó nchoxon kixin ijnko nkexro tsochénta it'é la ko ìné kixin: “It'èni, Ìnéni, chrokjuahya tsjinkitsani tí jaha kixin kaín tí nkehe chóntani mé k'óna Corbán” (mé t'axrjexín kixin kaín tí chichaon k'uáyéhe Dios). <sup>12</sup> A ntá xikaha jnkojín nkexro tsontáchro ch'án tíhi ntá jahará tsontáchrórá kixin í t'ichjánxinhya tsjinkitsa ch'án tí it'é ch'án la ko tí ìné ch'án. <sup>13</sup> A ntá tí xikaha la tìtoherá tí nkehe tsík'etōan Dios éxí sínkíhya, a ntá ókjé nkehe ich'erá, ntá tánkíhará chojni. Mé xikaha ich'erá nchónhya nkehe tóyóhe tíha —ichro ch'ín Jesús.

<sup>14</sup> Na ntá k'uíyehē ch'ín Jesús tí chojni inaá ntáchro ch'án kixin:

—Tinhínrá kaín rá tí nkehe ntáxrjan la ko tiénxinrá. <sup>15</sup> Tí nkehe ine chojni la jehya jie tíha. Tí nkehe t'axrjeníxin asén chojni mé jie tíha. <sup>16</sup> Tí tjinkáonrá chrókuinhínrá la chrókuinhínrá —ichro ch'án.

<sup>17</sup> A ntá tió kuítóhe ch'án kaín tí sín tsíkóchjina a na ntá jehe ch'án la ko tí sín k'uájiko ch'án mé k'uíxehen sín nchia. Na ntá kjuanchankíhi sín ch'án kixin nkexrí t'axrjexín tí nkehe kjuako ch'án a. <sup>18</sup> Na ntá ntáchro ch'ín Jesús kixin:

—¿Á kjaxinrá tiénxinhyará? ¿Á noahyará kixin tí nkehe ineni na jehya jie <sup>19</sup> kixin jehya asénni sátsji? Tí nkehe ineni na sátsji nkaya tseeni na ko xik'axrje inaá —ichro ch'án.

Mé t'axrjexín kixin tí nkehe sineni la jehya jie.

<sup>20</sup> Ntá ntáchro ch'ín Jesús kixin:

—A ntá tí nkehe t'axrjeníxin chojni na mé jie táha. <sup>21</sup> Nkaya asánrá mé t'axrjeníxin tí jínahya tjenkayáxinrá, la ko tí tjachēhe kíchuará, la ko tí

tjinkáonrá tsochontará chojni chjin ókjé, la ko tí t'oyán kichuárá <sup>22</sup> la ko tí chrókuđerá, la ko tí tjaké asánrá tí nkehe chóna ókjé sín, la ko tí jínahya ch'ehérá kichuárá, la ko tí kjuach'ia xrikoará la ko tí jínahya tjenkayáxinrá, la ko tí chjinoxínhanrá, la ko tí ch'énará kjuach'ia, la ko tí kjuahnke chontará, na kó ti chontahyará kjuaxrexinkaon jína. <sup>23</sup> Kaín tí nkehe jínahya a mé t'axrjeníxin chojni, la mé tjasixín sín jie.

*Ijnko tjan tsíkjiixin kjín mé kuítekaon tjan tí ch'ín Jesús*

*(Mt. 15.21-28)*

<sup>24</sup> Ntá ch'ín Jesús mé sákjuíxin ch'án ntiha ntá sákjuí ch'án nó chjasin Tiro la ko chjasin Sidón. Ntá k'uixenhen ch'án ijnko nchia kixin tjinkakon-hya ch'án kixin chrókónohe chojni kixin ntaha tjen ch'án. Kjánchó xitjahya kjuák'emá ch'án ntiha. <sup>25</sup> Na ntá ijnko ìné ijnko tjan tjarisoá chóna ijnko nchakuen tí jínahya mé kuínhin nkehe tí xra ch'e ch'ín Jesús kixin tjasin ch'án kjuaxroan, ntá tuénxín kui tjan kjuák'exín toch'in tjan chrínkí toté ch'ín Jesús. <sup>26</sup> Na mé jehe tjan tsíkjiixin kjín, na mé tsíkjiixin tjan nó nación Sirofenicia. Na ntá jehe tjan a mé kui tjan chrónóehē tjan tí ch'ín Jesús kixin chrókuakitsje ch'án tí nchakuen tí jínahya chóna xjeen tjan.

<sup>27</sup> Ntá ntáchro ch'ín Jesús kjuátehe ch'án kixin:

—Titohé senó chrókjónē tí xjan. Jehya tí jína chrókuakítsjahā xjan tí niotjā ntá chrótjahā koniā chrókjónē va —ichro ch'án.

<sup>28</sup> Ntá jehe tjan kjuátehe tjan ntáchro tjan kixin:

—Chaxín xikaha, Ìnchéni. Kjánchó kjónté tí konj̄a tjejoyánkí mesa ine tí tot'ò niot̄ja tóxènj̄in tí chánjan —ichro tjan.

<sup>29</sup> Na ntá ntáchro ch'ín Jesús kixin:

—Táha la chaxín ntoá ntáchrua. Sátjia kixin tí nchakuen tí jínahya ó k'uaxrjexín tí xjaan —ichro ch'án.

<sup>30</sup> A ntá tió kjuíji tjan ntoe tjan, na ntá k'uikon tjan kixin tí xjeen tjan na mé ó ntoá tjetsínkaták'á xjan tí cama kixin ó tsík'axrje tí nchakuen tí jínahya a.

*Ch'ín Jesús mé kjuínchekitohe jína ijnko ch'ín tienhya la ko nixjahya*

<sup>31</sup> Ntá ch'ín Jesús mé ó k'uaxrjexín ch'án inaá nó chjasin Tiro ntá k'uátsínka ch'án chjasin Sidón la ko k'uátsínka ch'án tí estado Decápolis ntá kjuíji ch'án nó ntayaon Galilea. <sup>32</sup> Ntá kuikao sín ijnko ch'ín tienhya na ko ntoáhya nixja ch'án. Ntá chrónóehē sín tí ch'ín Jesús a kixin tsjak'etja tja ch'án chrítaón kja tí ch'ín a kixin tsitohe ch'án jína. <sup>33</sup> Na ntá ch'ín Jesús k'uaxrjentako ch'án tí ch'ín tienhya, k'uaxrjenta sín tí kohya chojni. Na ntá tí dedo tja ch'án mé chr'áxenhēn ch'ín Jesús tatsjon tí ch'ín tienhya. La ko kjaxin tí dedo tja ch'án mé kuikite ch'án ntaté ch'án ntá kjuínchekákóxin ch'án nejen tí ch'ín nixjahya a. <sup>34</sup> Ntá konta ch'án nkajní k'uáváxin ch'án na ntá nixjehē ch'án tí ch'ín tienhya a, ntáchro ch'án kixin:

—Efata —mé t'axrjexín nkívee sín kixin: ¡Tsoxit-jehē!

<sup>35</sup> Na ntá tuénxín xítjehē tatsjon tí ch'ín tienhya ntá kuínhin ch'án la ko kuítóhe jína tí nejen ch'án,

ntá jína nixja ch'án. <sup>36</sup> Ntá ch'ín Jesús k'uetōan ch'án kixin ninkexró tsochenkahya sín. Ntá kjónté imá k'uetōan ch'án ntá ántōsén sín kjónté íchá xrichronka sín. <sup>37</sup> Na mé imá chrakon sín ntá ntáchro sín kixin:

—Kaín nkehe ch'e ch'án la jína. Tí chojni tienhya la tinhin sín la ko tí chojni nixjahya la nixja sín —ichro sín.

## 8

*Ch'ín Jesús mé kjuanjon nkehe kjóne noó mil chojni*

*(Mt. 15.32-39)*

<sup>1</sup> A ntá ijnko yaon nchónhya chojni k'uixikóchjina inaá. A ntá chóntahya sín nkehe sine sín. Na ntá ch'ín Jesús mé k'uíyehē ch'án tí sín k'uájiko ch'án, a ntá ntáchro ch'án kixin:

<sup>2</sup> —Imá tikonóahā kaín tí sín i kixin ó ní yaon tjékian sín ntihi ntá chóntahya sín nkehe sine sín.

<sup>3</sup> Ntá chrókuétuānhya sín sáchrókjui sín ntōe sín tí naxā nehya sín kixin ntīa ó chrókótiēnxin sín kixin iso sín la imá kjín tsíkji\_xin sín —ichro ch'ín Jesús.

<sup>4</sup> Na ntá kjuátehe tí sín k'uájiko ch'án ntáchro sín kixin:

—¿Nkexrí chrókónoxín nchónhya niotjā chrókjóne kaín tí sín a kixin kohya nchia tí tjejóni? —ichro sín.

<sup>5</sup> Na ntá ntáchro ch'ín Jesús kixin:

—¿Nkekjaín niotjā chontará jahará? —ichro ch'án.

Ntá jehe sín kjuátehe sín ntáchro sín kixin:

—Yato niotjā chóntani —ichro sín.

<sup>6</sup> Na ntá ch'ín Jesús k'uetuēnhen ch'án kaín xín sín kixin ts'ixitjā\_xin sín nonte. Ntá kuákja ch'án tí

yato niotja ntá kjuanchehe ch'án kjuasáyé Dios ntá kóchrít'ò ch'án tí niotja a. Ntá chjéhe ch'án tí sín k'uájiko ch'án kixin jehe sín ts'óxíkayehe sín tsakja kaín xín tí sín síin a. <sup>7</sup> Na ko iso koche ntsíntsí chónṭa sín. Ntá ch'ín Jesús kjuanchia ch'án kjuasáya ntá k'uetṭoan ch'án ts'óxíkayehe sín kjaxin. <sup>8</sup> Na mé kaín xín sín kjóne sín na kókjehe sín. Ntá chr'éxin naxa kjuínchekaon sín yato ntaxra tí tot'ò tí nkehe tsíxehe. <sup>9</sup> Na mé chjina noó mil chojni kjóne sín. Ntá ch'ín Jesús mé nixjehe ch'án sín sákjuí sín <sup>10</sup> ntá tuénxín jehe ch'án la kó tí sín k'uájiko ch'án na mé k'uit'ótjen sín tí ntabárcṵ a sákjuí sín nó tí nonte Dalmanuta.

*Tí sín fariseo tjanchia sín ijnko kjuaxroan jié  
(Mt. 16.1-4; Lc. 12.54-56)*

<sup>11</sup> Na ntá kui iso sín fariseo kjuankíxin sín tjo sín tí ch'ín Jesús kjuanchehe sín ch'án kixin chrókjuakoxin ch'án ijnko kjuaxroan jié kuènte nkaya nkajní kixin tjinkaon sín chrókjuachaxin sín ch'án. <sup>12</sup> A ntá ch'ín Jesús na mé k'uáváxin ch'án ikjín kjanxin asén ch'án ntá ntáchro ch'án kixin:

—¿Nkekuènté kixin tí chojni i na mé tjanchia sín ijnko kjuaxroan jié? Ijie la ninkehó kjuaxroan tsjákoxinhya —ichro ch'án.

<sup>13</sup> Na ntá kuítóhe ch'án tí sín a, ntá xík'it'ótjen ch'án tí ntabárcṵ ntá sákjuí ch'án í jnko tóhe ntayaon inaá.

*Tí xroan nchek'ánkí tí niotjé tí sín fariseo  
(Mt. 16.5-12)*

<sup>14</sup> Ntá k'uitjáyenhen sín tsíkjikohya sín nkehe sine sín. Jehó jnkokoá niotja chónṭa sín nkaxenhen tí

ntabárcɔ a. <sup>15</sup> Ntá ch'ín Jesús k'uetuēnhen ch'án tí jehe sín kixin:

—Chrókóxakonhanrá kixin tí xroan nchek'ánkí niotjé tí sín fariseo la ko niotjé tí ch'ín Herodes a —ichro ch'án.

<sup>16</sup> Ntá tí sín xriko ch'án mé kjo sín kichó sín kixin:

—Mé xikaha ichro ch'án kixin tsíkjikohyani niotja.

<sup>17</sup> Ntá kónohe ch'ín Jesús kixin nkehe tí kjo sín kichó sín ntá ntáchro ch'án kixin:

—¿Nkekuènté tjórá kixin chontahyará niotja? ¿Á naxa tiénxinhyará la ko naxa noahyará? ¿Á kénhya asánrá tinkachónkirá Dios? <sup>18</sup> ¿Á t'ikonxinhyará ikonrá la ko á tiénxinhyará tátsjinrá? ¿Á xráxinkákonhyará? <sup>19</sup> Tió kóchrít'va tí n'ó niotja kjóne in'ó mil chojni na ¿nkekjaín ntaxra tí tot'ò niotja naxa kjuenájjinrá? —ichro ch'án.

Ntá jehe sín kjuátēhe sín ntáchro sín kixin:

—Teyó ntaxra tí nkehe kjuenájinni —ichro sín.

<sup>20</sup> Xíntáchro ch'ín Jesús ínaá kixin:

—Na ko tí kóchrít'va tí yato niotja kjóne noó mil chojni na ¿nkekjaín ntaxra tí tot'ò niotja kjuenájjinrá? —ichro ch'ín Jesús.

Ntá ntáchro sín kixin:

—Yato ntaxra —ichro sín.

<sup>21</sup> Ntá ch'ín Jesús ntáchro ch'án kixin:

—Kjónté xikaha la, ¿á naxa tiénxinhyará? —ichro ch'án.

*Ch'ín Jesús mé kjuínchekitohe jina ijnko ch'ín t'ikonhya tí chjasin Betsaida*

<sup>22</sup> A ntá chr'éxin kjuíji sín chjasin Betsaida, a ntá ikui iso sín kuikao ijnko ch'ín t'ikonhya. Ntá

chrónóēhe sín tí ch'ín Jesús kixin chrókjuinchekitohe ch'án jína tí ch'ín a. <sup>23</sup> Ntá ch'ín Jesús mé itsé ch'án tja tí ch'ín t'ikonhya a ntá k'uaxrjentako ch'án ikon tí chjasin a. Na ntá kuikitehe ch'án ntaté ch'án ikon tí ch'ín t'ikonhya a la ko kjuak'etja tja ch'án ntá kjuanchankíhi ch'án kixin:

—¿Á ó t'ikuan ntsí? —ichro ch'án.

<sup>24</sup> Ntá ntáchro tí ch'ín t'ikonhya kixin:

—T'ikonni chojni, kjánchó éxí nta tsjehe itji —ichro ch'án.

<sup>25</sup> Ntá ch'ín Jesús mé xíjak'etja tja ch'án inaá tí kon tí ch'ín t'ikonhya a. A ntá tí ch'ín k'uikonhya kuitohe ch'án jína la jína t'ikon ch'án kaín nkehe.

<sup>26</sup> Na ntá ch'ín Jesús mé k'uetuēnhen ch'án tí ch'ín k'uék'ikonhya kixin sátsji ch'án ntōe ch'án ntáchro ch'án kixin:

—Chrók'uixenhya chjasin la ko ninkexró chróchenkahya ntiha —ichro ch'án.

*Ch'ín Pedro chrónka ch'án kixin ch'ín Jesús mé tí nkexro Cristo*

*(Mt. 16.13-20; Lc. 9.18-21)*

<sup>27</sup> A ntá tí ch'ín Jesús la ko tí sín k'uájiko ch'án sákjuí sín tí chjasin ntsí chjino Cesarea de Filipo. A ntá tí ntja mé kjuanchankíhi ch'ín Jesús tí sín k'uájiko ch'án kixin:

—¿Nkehe ntáchro chojni kixin nkexro tí janhan? —ichro ch'án.

<sup>28</sup> Ntá ntáchro sín kixin:

—Iso sín mé ntáchro sín kixin jaha mé ch'ín Juan Bautista, ichro sín. A ntá í so sín na mé ntáchro sín kixin jaha mé ch'ín Elías, ichro sín. A ntá í so sín mé ntáchro sín kixin jaha mé ijnko tí sín tsíchrónka itén Dios ósé —ichro sín.

29 Ntá kjuanchankíhi ch'án sín ínaá kixin:  
—¿A ntá jahará nkechorá kixin nkexro tí janhan? —ichro ch'án.

Ntá kjuátehe ch'ín Pedro ntáchro ch'án kixin:

—Jaha mé tí Cristo, ichroni —mé chro ch'án.

30 Ntá k'ueṭoan ch'ín Jesús kixin tsochenkahya sín ninkexró.

*Ch'ín Jesús chrónka ch'án kixin ts'en ch'án*

*(Mt. 16.21-28; Lc. 9.22-27)*

31 Na ntá kjuankíxin kjuako ch'ín Jesús kixin tí Xjeen Dios K'óna Chojni mé t'ichjánxin kixin imá tsjasóte ch'án la ko tsotjinkakonhya kaín tí sín táda kuènte nínko la ko tí sín t'etoan kuènte tí sín ncha'tá la ko tí sín maestro tjako tí ley. A ntá tí sín a mé ts'óyán sín ch'án. Kjánchó tí nixin yaon na ó tsoxechón ch'án ínaá. 32 Kaín tíha mé ntoá chrónka ch'án. A ntá ch'ín Pedro mé kuakitsjenta ch'án tí ch'ín Jesús chrókjuentuéhe ch'án. 33 Na ntá kuinkátjía ch'ín Jesús komá ch'án kaín tí sín k'uájiko ch'án a. Ntá kjuentuéhe ch'án tí ch'ín Pedro a ntáchro ch'án kixin:

—¡Sátjia ntáha, Satanás! Jaha la tjenkayáxinhya éxí tjenkayáxin Dios. Náhí. Jaha tjenkayáxian éxí tjenkayáxin chojni ó —ichro ch'án.

34 Ntá ch'ín Jesús mé k'uíyehē ch'án tí sín k'uájiko ch'án la ko tí sín tsíkóchjina a. Ntá ntáchro ch'án kixin:

—Tí jnkójínrá tjinkáonrá tsochréhérá tí janhan na t'ichjánxin tsítóhérá kaín tí nkehe tjaké asanrá na ntá tsamárá tí ntacruz kuéntará, a ntá tsochréhérá tí janhan. 35 A ntá tí nkexro tjinkaon jehó sinchekaá asén mé ts'itjáyan. A ntá tí nkexro sinchek'itjáyanxín asén kixin tinkáchónki

tí janhan la ko chrónkaxín tí tan tsjanjon kjuachón mé tsaá. <sup>36</sup> ¿A ntá nkehe tsonhen tí chrókjuacha ijnko chojni chróchóna kaín nkehe síin chjasintajni, a ntá kjuachón chrókjuinçek'itjáyan? <sup>37</sup> ¿Nkehe chrókjuenkā chojni kixin chróchóna tí kjuachón? <sup>38</sup> A ntá jnkojín nkexro tsosuehē kixin tinkáchónki tí janhan la ko tí tan kuèntāna nkayakon tí chojni jínahya chóna jie la kjaxin tí Xjeen Dios K'óna Chojni tsosuehē ch'án tsontáchro ch'án kixin chóxin ch'án tí jehe sín tió tsokjan ch'án tsikao ch'án tí kjuachaxin jie kuènte It'é la ko tsikao tí sín ángel.

## 9

<sup>1</sup> Na ko kjaxin chrónka ch'ín Jesús kixin:

—Chaxín ntáxrjan kixin isorá tjejorá ntihi la naxa ts'énhyará ts'ikonjiará itsi tí kjuachaxin ts'etqan Dios —ichro ch'án.

*Ch'ín Jesús mé k'uúxitoxin nkexrí tsjehe ch'án  
(Mt. 17.1-13; Lc. 9.28-36)*

<sup>2</sup> Ntá k'uátsínka injon yaon ntá ch'ín Jesús mé sákjuiko ch'án ch'ín Pedro la ko ch'ín Jacobo la ko ch'ín Juan sákjuj sín jehó sín ijnko jnā noi. Ntá ntiha mé xrínahya k'uúxitoxin ókjé nkexrí tsjehe ch'án k'uíkon tí jehe sín. <sup>3</sup> A ntá iké ch'án tsík'óna imá tjákini la ko imá tjóá éxí chrinta tsjehe, a ntá ntihi chjasintajni kohya ninkexró chrókjuen tí ka chrókuítóhe imá tjóá xikaha. <sup>4</sup> Na ntá titàya k'uíkuèn sín ntiha itjen tí ch'ín Elías la ko tí ch'ín Moisés tjejótjo sín tí ch'ín Jesús. <sup>5</sup> A ntá ch'ín Pedro mé ntáche ch'án tí ch'ín Jesús kixin:

—Maestro, jína kixin tjejóni ntihi. Chrókjuich'éñani iní nchia la mé ijnko kuèntá la

ko ijnko kuènte ch'ín Moisés la ko ijnko kuènte ch'ín Elías.

<sup>6</sup> Mé xikaha ichro ch'án kixin kaín sín la imá chrakon sín la tí ch'ín Pedro la mé í noehya ch'án nkehe tsixro ch'án. <sup>7</sup> Na ntá xríñahya ikui ijnko tjuí kjuák'etja chrítaón kaín sín tí tjejó sín. Na ntá chríkjan tí tjuí kuínhin sín itén ijnko nkexro nixja na mé ntáchro kixin:

—Tí nkexro i mé xjanna. Imá tjuahā ch'án. Chrókuinhínrá tí nkehe tjako ch'án.

<sup>8</sup> Na ntá tió tsjehe sín nkuíxín tí tjejó sín la í kohya tí iyó sín a. Jehó tí ch'ín Jesús tjejóko sín.

<sup>9</sup> A ntá tí ó k'uínkajinxín sín tí jñā ntá k'uetōan ch'ín Jesús kixin tsochenkahya sín ninkexró tí nkehe k'uíkon sín hasta tsoxechónjian tí Xjeen Dios K'óna Chojni. <sup>10</sup> Ntá ninkexró chenkahya sín tí nkehe k'uíkon sín. Na ntá jehó sín mé tjejótjo sín kixin nkehe t'axrxjexín tí nkehe chrónka ch'án kixin tsoxechón ch'án ínaá. <sup>11</sup> Na ntá kjuanchankíhi sín tí ch'ín Jesús ntáchro sín kixin:

—¿Nkekuènte kixin ntáchro tí sín tjako tí ley kixin saoxín itsi tí ch'ín Elías la ntá chr'éxín itsi tí nkexro tsaáxinni? —ichro sín.

<sup>12</sup> Ntá ntáchro ch'ín Jesús kixin:

—Chaxín saoxín itsi ch'ín Elías la ntá tsjasiyóxin ch'án kaín sín nkehe. ¿A ntá nkehe ntáchro xroon itén Dios kixin nkehe tsonhen tí Xjeen Dios K'óna Chojni? Na mé ntáchro kixin t'ichjánxín tsjasóte la ko tsotjinkakonhya sín. <sup>13</sup> Kjánchó ó xrjanka kixin chaxín ó tsíki ch'ín Elías, ntá kjuínchekjasóte sín ch'án éxí kóxrjínhín sín éxí nixja tí xroon itén Dios kixin xikaha tsonhen —mé xikaha chrónka ch'ín Jesús.

*Ch'ín Jesús mé kjuínchekitohe jína ijnko xjan chóna ijnko nchakuen tí jínahya*

*(Mt. 17.14-21; Lc. 9.37-43)*

<sup>14</sup> A ntá tió ikjan sín tí kuítóhe tí í so sín k'uájiko ch'án ntá k'uíkon sín kixin nchónhya chojni tsík'antatjen tí jehe sín. Kjaxin ntaha síin tí sín tjako tí ley ikjo tí jehe sín. <sup>15</sup> A ntá tuénxín tió k'uíkon sín tí ch'ín Jesús na ntá kaín sín kóchéhe sín tinká sín sákjuíchréhe sín ch'án, tsonixjehe sín ch'án. <sup>16</sup> Ntá ch'ín Jesús kjuanchankíhi ch'án sín ntáchro ch'án kixin:

—¿Nkehe tí tjórá tí sín i? —ichro ch'án.

<sup>17</sup> Ntá tjen ijnko ch'án tjenkákjan sín ntiha kjuátehe ch'án kixin:

—Maestro, ntihi kjuíkian ijnko xjanna chóna nchakuen tí jínahya na mé nchenixjahya xjan.

<sup>18</sup> Kjónté nkerí tjen xjan la tí nchakuen tí jínahya mé tjáka xjan nonte, ntá ntálóxrjo sítixin ir'va xjan na netaón xjan neno xjan na méxra tjehya xjan. Ntá xrjanóaha tí sín xrikoa kixin chrókuakitsje sín tí nchakuen tí jínahya a. Kjánchó kjuachahya sín —ichro ch'án.

<sup>19</sup> Ntá ch'ín Jesús kjuátehe ch'án ntáchro ch'án kixin:

—Jahará chojni kénhya asánrá tinkachónkirá Dios. ¿Xá hasta nkesá tjinkáonrá naxa ts'ejóni? ¿Xá hasta nkesá tsjácha tsjak'é tsjákohará? Xrákōará ntihi tí xjan méhe —ichro ch'án.

<sup>20</sup> Na ntá kóchjinako sín tí xjan a. Na ntá tí nchakuen tí jínahya mé k'uíkon tí ch'ín Jesús ntá kjuínchek'aniáte tí xjan a kjuítsínka xjan nonte la kjaminkítaón xjan nonte la sítji ntálóxrjo ir'va xjan.

21 Ntá ch'ín Jesús mé kjuanchankíhi tí it'é tí xjan a ntáchro ch'án kixin:

—¿Á ósé xikaha tónhen xjan? —ichro ch'án.

Ntá ntáchro tí it'é tí xjan kixin:

—Desde naxa xjanntsí xjan. 22 A ntá jnkoyaxón tí nchakuen tí jínahya a mé tjákáte xjan xrohi la ko tjákánkí xjan ìnta kixin tjinkaon chrók'óyán tí xjan a. A ntá jaha ¿á tsjácha tsjínkítsani? La tikonóehéni tsjínkítsani —ichro ch'án.

23 Ntá ntáchro ch'ín Jesús kixin:

—¿Nkekuènté tjanchankìna kixin á tsjácha? Tí tsitekávan la kaín nkehe la jína tsonhen, kixin tí nkexro tsitekaon Dios la jína tsonhen kaín nkehe —ichro ch'án.

24 Ntá tuénxín itsen kjuátehe tí it'é xjan, ntáchro ch'án kixin:

—Ó titekaonni. Tsjínkítsani kixin antsí má tsitekaonni tí jaha —ichro ch'án.

25 Ntá k'uíkon ch'ín Jesús kixin itsjé chojni kóchjina. Ntá nixjehe ch'án tí nchakuen tí jínahya chóna tí xjan a ntáchro ch'án kixin:

—Jaha la ijnko nchakuen tí jínahya nchenix-jahya chojni la ko nchekíenhya chojni. Ijie la tétuanhan kixin t'axrjéxian tí xjan na ko tsitohé xjan la í tsokjanhya inaá —ichro ch'án.

26 Ntá tí nchakuen tí jínahya a na mé k'óyato la ko kjuínchek'aniáte tí xjan a inaá, ntá k'uaxrjexín ntiha. Na éxí tsík'en xjan xikaha tsjehe xjan. Ntá itsjé sín ntáchro sín kixin ó tsíkjixin tsík'en xjan, ichro sín. 27 Na ntá ch'ín Jesús mé tséhe tja tí xjan kjuínchek'inkatjen ch'án xjan.

28 Ntá ch'ín Jesús la ko tí sín k'uájiko ch'án k'uíxenhén sín ijnko nchia. Ntá jehe sín kjuanchankíhi sín ch'án kixin:

—¿Nkekuènté kixin kjuachahyani kuakitsjeni tí nchakuen tí jínahya a? —ichro sín.

29 Ntá ntáchro ch'án kixin:

—Tíhi la t'ichjánxin kixin nchónhya tsochronóehérá T'aná la ko sintehyará —ichro ch'án.

*Yóxin chrónka ch'ín Jesús kixin its'en ch'án  
(Mt. 17.22-23; Lc. 9.43-45)*

30 A ntá tió sákjuíxin sín ntiha ntá k'uátsínka sín estado Galilea. A ntá ch'ín Jesús tjinkakonhya ch'án kixin ninkexró ntiha tsonohe sín <sup>31</sup> kixin tinkákjakohe ch'án tí sín k'uájiko ch'án a. Na mé chrónka ch'án ntáchro ch'án kixin:

—Tí Xjeen Dios K'óna Chojni mé tsotsé sín ch'án la ko tsjikaán sín ch'án na ko ts'óyán sín ch'án. Kjánchó tí yaon níxin na ó tsoxechón ch'án inaá —ichro ch'án.

32 Ntá jehe sín mé kíenxínhya sín nkehe tí ntáchro ch'án la chrakon sín chrókjuanchankíhi sín ch'án nkexrí t'axrjexín tíha.

*¿Nkexro tí imá tjeoan?  
(Mt. 18.1-5; Lc. 9.46-48)*

33 Ntá kjuíji sín chjasin Capernaum; a ntá tí tjejó sín tí nchia ntiha ntá ch'ín Jesús mé kjuanchankíhi ch'án sín ntáchro ch'án kixin:

—¿Nkehe tí tinkakjórá kíchuará tí kuini ntja? —ichro ch'án.

34 Ntá jehe sín la táníkoá sín kixin tí ntja kui sín tinkákjo kichó sín kixin nkexro tí imá ts'etjoan.

35 Ntá ch'ín Jesús mé kjuák'etjajxin ch'án ntá

k'uíyehē ch'án tí teyó sín k'uájiko ch'án, a ntá ntáche ch'án sín kixin:

—Tí jnkójínrá tjinkáonrá chrókuétoanrá má ntá t'ichjánxín kixin tsjixixín tsochréhérá kaín sín, ts'ítuanhanrá la ko tsjínkĩtsará kaín xín sín —ichro ch'án.

<sup>36</sup> Ntá tséhe ch'án tja ijnko chánjan kjuak'e ch'án jnkosiné tí tjejó tí jehe sín a, ntá kjóa ch'án tí xjan a. Ntá ntáchro ch'án kixin:

<sup>37</sup> —Tí jnkójín nkexro chrók'uáyéhe ijnko chánjan kixin tinkáchónki sín tí janhan la mé xikaha chrók'uáyéhe sín tí janhan la ko kjaxin éxí chrók'uáyéhe sín tí nkexro ichr'ánna —ichro ch'án.

*Tí nkexro nínkakuenhyani tí jeheni la tjinkĩtsa tí jeheni*

*(Lc. 9.49-50; Mt. 10.42)*

<sup>38</sup> A ntá ch'ín Juan mé ntáchro ch'án kixin:

—Maestro, k'uíkonní ijnko chojni na mé kjuachaxin ihniá mé takitsjexín ch'án nchakuen tí jínahya chóna chojni. Ntá k'uetuēnhenni ch'án kixin xikahya chrókjuich'e ch'án kixin xrikohyani ch'án —ichro ch'án.

<sup>39</sup> Ntá ntáchro ch'ín Jesús kixin:

—Nté t̄j̄ohé ch'án kixin ninkexró tjasixín kjuaxroan kjuachaxin n̄ina la tuénxín chrókjuacha chrók'uántax̄ina sín. <sup>40</sup> Tí nkexro nínkakuenhyani la mé tjinkĩtsa tí jeheni. <sup>41</sup> A ntá jnkójín nkexro tsotjáhará kjónté ijnko vaso ìnt̄a tsjanjonxín sín n̄ina kixin jahará la tinkachónkirá Cristo, ntáxrjan kixin chaxín ts'áyéhe sín nkehe.

*Tí chojni tjasin j̄j̄é mé tsjasóte sín*  
*(Mt. 18.6-9; Lc. 17.1-2)*

42 'A ntá jnkojín nkexro chrókjuachroe ijnko xjan kixin chrókjuasin xjan jie tió tinkáchónki xjan tí janhan la íchá jína chrókjuincheteyá sín ch'án ijnko xro jie tsík'óna xrochre la chrókjuikákánkí sín ch'án ntayaon. 43 A ntá tí itjá tjásixián jie na mé íchá chrókójína chrókochrínjian kixin kjónté jnkokoá tjá mé tsochontaxián kjuachón. A ntá tí yói tjá la tíha mé sáchrókjuíxian tí síin xrohi xitjahya ts'anka, 44 tí síin kosintō t'enhya la ko síche xrohi ts'ankahya. 45 A ntá kjaxin tí totá tjásixián jie na íchá jína chrókochrínjian kixin kjónté jnkokoá totá mé tsochontaxián kjuachón. A ntá tí yói totá la tíha sáchrókjuíxian tí síin xrohi xitjahya ts'anka, 46 tí síin kosintō t'enhya la ko síche xrohi ts'ankahya. 47 A ntá tí ikuan tjásixián jie na íchá jína chrókuakitsjenkiá tí kuan a kixin kjónté jnkokoá kuan mé sáchrókjuia tí tjen Dios t'etōan. A ntá tí yói kuan la tíha mé sáchrókjuíxian tí síche xrohi 48 tí síin kosintō t'enhya la ko síin xrohi ts'ankahya.

49 'A ntá kaín nkexro t'ichjánxìn tsjasóte. A ntá kaín nkehe ts'áyéhe Dios chóna xijnta. 50 Tí xijnta la jína. A ntá tí chrók'uankehe tí jní la ntá xitjahya chrókójní inaá. Jahará mé chrókóyohará éxí xijnta kixin kjuaxróxin chrók'uejokoará kichuára —ichro ch'án.

## 10

*Tjako ch'ín Jesús kixin chrókjuákehya kichó sín  
(Mt. 19.1-12; Lc. 16.18)*

<sup>1</sup> Na ntá ch'ín Jesús mé k'uaxrjexín ch'án chjasin Capernaum sákjuí ch'án nó estado Judea la ko nó tóhe ntario Jordán. Ntá nchónhya chojni kójnkotsé

sín tí tjen ch'án ntiha. Ntá kjuakohe ch'án tí jehe sín kixin xikaha kuènen ch'án. <sup>2</sup> Ntá iso sín fariseo mé kóchjinehe sín ch'án kjuanchankíhi sín ch'án nkehe, chrókjuachaxin sín ch'án. Ntáchro sín kixin:

—¿Á siín kjuachaxin tsjákehe chojni ntoa ichjién? —ichro sín.

<sup>3</sup> Ntá kjuátehe ch'án ntáchro ch'án kixin:

—¿Nkehe tí k'uetuñhanrá tí ch'ín Moisés? —ichro ch'án.

<sup>4</sup> Ntá ntáchro sín kixin:

—Ch'ín Moisés kjuanjon ch'án kjuachaxin kixin ts'óna ijnko xroon tsakja tí ichjién kixin ts'itjéxín kichó sín —ichro sín.

<sup>5</sup> Ntá ch'ín Jesús ntáchro ch'án kixin:

—Ntá jahará icha asánrá titekákonhyará ntá k'uetuñ ch'án ts'óna tí xroon a. <sup>6</sup> Kjánchó tí xrankíxixín tió kjuích'éna Dios kaín xín nkehe la kjuích'éna ch'án ijnko chojni ntoa la ko ijnko chojni chjin.\* <sup>7</sup> Méxra tí chojni ntoa tsítóhe ch'án tí it'é ch'án la ko ìné ch'án kixin tsakja ch'án ichjién ch'án <sup>8</sup> ntá yóí sín ts'óna sín éxí jnkokoá chojni. Méxra jehya yaá chojni. Náhí, jnkokoá.† <sup>9</sup> Na mé xikaha tí kjuachaxin kuènte Dios kójnkojiéxín sín ntá jehe sín chrók'uitjéhya kichó sín —ichro ch'án.

<sup>10</sup> A ntá tjejó sín nchia ntá tí sín k'uájiko ch'án a mé kjuanchankíhi sín ch'án inaá kixin á xitjahya ts'itjíhi kichó sín. <sup>11</sup> Na ntá ntáchro ch'ín Jesús kixin:

—Tí jnkojín nkexro tsjákehe ichjién ntá tsakja ch'án í jnko chjin na mé xikaha tsjáchehe ch'án tí tjan tsikótehe ch'án saoxín. <sup>12</sup> La ko kjaxin tí chojni

\* **10:6** Génesis 1.27; 5.2 † **10:8** Génesis 2.24

chjin tsíkjákehē xì tsakja tjan í jnko chojni ntoa na mé xíkaha kjaxin tjan tjasin tjan jie —ichro ch'án.

*Ch'ín Jesús kjuíncheyaon ch'án xjan  
(Mt. 19.13-15; Lc. 18.15-17)*

<sup>13</sup> Ntá kjuíkəo sín xjan kixin tjinkaon sín tsjak'etja tja ch'ín Jesús tí xjan a. Ntá tí sín k'uájiko ch'án mé kóninkakonhen sín tí sin kjuíkəo xjan.

<sup>14</sup> Ntá k'uíkəon ch'ín Jesús ntá kónínkaon ch'án ntáchro ch'án kixin:

—Nté títəhərá tí xjan tsoxrakoa tí tjén janhan la t'inkakuənhərá xjan kixin tí sín kuənte kjuachaxin kuənte Dios la mé tóyóhə éxí tí xjan a. <sup>15</sup> Ntá chaxín ntáxrjan kixin tí nkexro ts'ónahya éxí ijnko chánjan xitjaha ts'ejó sín tí ts'ətoan Dios tí kjuachaxin kuənte ch'án —ichro ch'án.

<sup>16</sup> Ntá kjóa ch'án tí xjan a kjuak'etja tja ch'án xjan la kjuíncheyaon ch'án.

*Ijnko ch'ín ntasoá rico nixjehə ch'án tí ch'ín Jesús  
(Mt. 19.16-30; Lc. 18.18-30)*

<sup>17</sup> A ntá tió sákjuí ch'ín Jesús ínaá ntá xrakoa ijnko ch'ín tinká ch'án kjuák'exín toch'in ch'án nkayakon tí ch'ín Jesús kjuanchankí ch'án kixin:

—Jaha, maestro jína. ¿Nkexrí chrókjuich'eni kixin chrók'uitjani kjuachón jnkochrín? —ichro ch'án.

<sup>18</sup> Ntá ntáche ch'ín Jesús tí jehe ch'án kixin:

—¿Nkekuənté ntáchrúa kixin jína tí janhan? Jehó jnkokoá nkexro mé jína la tíha mé Dios.

<sup>19</sup> Ntá jaha ó noha kixin nkexrí k'uətoan Dios kixin: “Chrókjuacheéhya kíchuaá la chrók'oyánhya chojni la chrókueehya la chrókjóntahya kíchuaá la

chrókjuich'iahya la ko chróchontehé kjuasáya it'á la ko iná"† —ichro ch'án.

<sup>20</sup> A ntá jehe ch'án kjuátehe ch'án ntáchro ch'án kixin:

—Maestro, kaín tíha kjuínchexiteyáni desde nta-soáni —ichro ch'án.

<sup>21</sup> Ntá ch'ín Jesús mé komá ch'án la ko tjuèhe ch'án tí ch'ín a. Ntá ntáchro ch'án kixin:

—Naxa t'itjáyan jnkokoá nkehe chrókjuich'e. Sátjia nchekjia kaín tí nkehe chonta. A ntá tí chichaon sinchekjixián tí nkehe chonta la mé nchekitonhén tí chojni nòa, a ntá tí nkehe tjete tsochonta nkaya nkajní. A ntá tió tsjixin tsjánjuan kaín ntá tsjihá tamá tí ntacruz kuènta la chréhé tí janhan —ichro ch'án.

<sup>22</sup> Ntá tió kuínhin ch'án xikaha ntá k'uává ch'án sákjuí ch'án, kixin imá tsjé nkehe chóna ch'án.

<sup>23</sup> Ntá ch'ín Jesús komá ch'án tí sín siín ntiha ntáche ch'án tí sín siín k'uájiko ch'án kixin:

—Imá xra ijnko chojni chóna imá tsjé nkehe ts'ixenhen sín tí tjen Dios t'etōan —ichro ch'án.

<sup>24</sup> Ntá tóxakonhen tí sín k'uájiko ch'án kixin xikaha ntáchro ch'án. Ntá chrónka ch'án inaá kixin:

—Tí sín tjekonhen tí nkehe chóna sín na imá xra ts'ixenhen sín tí tjen Dios t'etōan. <sup>25</sup> Antsí xrahya chrók'uátsínka ijnko kocamello ijnko tjar'in ntachica tjexrja. A ntá antsí má xra ijnko ch'ín chóna itsjé nkehe chrók'uixenhen ch'án tí tjen Dios t'etōan —ichro ch'án.

<sup>26</sup> Ntá jehe sín kuínhin sín xikaha ntá imá chrakon sín. Ntá tjanchankíhi kichó sín kixin:

† 10:19 Éxodo 20.12-16; Deuteronomío 5.16-20

—Tí xikaha la, ¿xá nkexro chrókjuacha chrókuaá?  
—ichro sín.

<sup>27</sup> Ntá komá ch'ín Jesús tí jehe sín ntáchro ch'án kixin:

—A ntá chojni ó tsjachahya sich'e tíha, a ntá Dios jína sich'e kaín nkehe, kixin Dios la kohya nkehe tsjachahya sich'e —ichro ch'án.

<sup>28</sup> Ntá ch'ín Pedro ntáchro ch'án kixin:

—Ínchéni, kaín ni mé kuítóheni kaín nkehe chóntani ntá chréheni tí jaha —ichro ch'án.

<sup>29</sup> Ntá kjuátehe ch'ín Jesús ntáchro ch'ín kixin:

—Chaxín ntáxrjan kixin jnkójín nkexro tsítóhe ntoe sín la o tí kichó ntoa o tí kichó chjin la o it'é o iné sín o ichjién sín o xjeen sín o nontee kixin tinkáchónki sín tí janhan la ko tjinkaon sín chrókjuako sín tí tan tsjanjon kjuachón <sup>30</sup> na mé ntihi chjasintajni tsochónta sín ciento veces nchónhya ntoe sín la ko éxí kichó sín la ko éxí iné sín la ko éxí xjeen sín ts'ikon sín itsjé chojni kjé la ko éxí nontee sín xikaha ts'ikon sín itsjé nonte. Kjónté tsjasóte sín ntihi chjasintajni ntá chr'éxin tsochónta sín tí kjuachón jnkochrín. <sup>31</sup> A ntá itsjé tí sín t'etōan ijie mé tsjixixín tsochréhe sín. A ntá itsjé tí sín t'ítuenhen ijie, na mé tí sín a mé ts'etōan sín tí ntiha.

*Níxin chronka ch'ín Jesús kixin its'en ch'án  
(Mt. 20.17-19; Lc. 18.31-34)*

<sup>32</sup> Ntá tjejóti sín chrìn sín tí ntia sátsji chjasin Jerusalén. Ntá ch'ín Jesús mé tjetaón ch'án ntia ntá tí sín k'uájiko ch'án mé tóxakonhen sín chrakon sín chréhe sín. Ntá k'uíyehé ch'án jehó tí teyó sín inaá ntá kjuankixin ch'án chénka ch'án sín nkexrí tí nkehe tsonhen ch'án. <sup>33</sup> Ntá ntáchro ch'án kixin:

—Ijie sátsjini Jerusalén. Na ntá tí Xjeen Dios K'óna Chojni mé tsotsé sín ch'án tsjikénhen sín tí sín nchat'á t'etoan la ko tí sín tjako tí ley. Ntá ts'etoan sín kixin its'en ch'án. Ntá sinchek'áyéhe sín ch'án tí sín jehya judío. <sup>34</sup> Ntá jehe sín la tsjanoá sín tí jehe ch'án la ko ntaté sín tsikite sín ch'án la ko tsjate sín ch'án ntá ts'oyán sín ch'án. Kjánchó tí yaon níxin mé tsoxechón ch'án inaá —mé xikaha ichro ch'ín Jesús.

*Ch'ín Jacobo la ko ch'ín Juan tjanchia sín nkehe  
(Mt. 20.20-28)*

<sup>35</sup> A ntá tí ch'ín Jacobo la ko ch'ín Juan mé xjeen ch'ín Zebedeo mé kóchjinehe sín tí ch'ín Jesús ntá ntáchro sín kixin:

—Maestro, tjanchahani ijnko xra —ichro sín.

<sup>36</sup> Ntá kjuanchankí ch'ín Jesús ntáchro ch'án kixin:

—¿Nkehe tí xra tjinkáonrá chrókjuít'ahará? —ichro ch'án.

<sup>37</sup> Ntá ntáchro sín kixin:

—Tió tsétoanxián tí kjuachaxián jié na tjinkaonni kixin ijnkonni chrókjuak'eni itjá chjina a íjnkonni chrókjuak'eni itjá kjon —ichro sín.

<sup>38</sup> Ntá ntáche ch'ín Jesús tí jehe sín kixin:

—Jahará la noahyará nkehe tí tjanchanará. ¿Á chrókjuachará chrók'uirá tí nkehe itsjá its'ia janhan la ko á chrókjuachará chrókuikiterá éxí tsikite janhan? —ichro ch'án.

<sup>39</sup> Ntá jehe sín kjuátehe sín ntáchro sín kixin:

—Kja tsjachani —ichro sín.

Ntá ntáche ch'ín Jesús tí jehe sín kixin:

—Chaxín its'irá éxí tí nkehe tsjá its'ia la ko tsikiterá éxí tsikite janhan. <sup>40</sup> Kjánchó janhan xitjahya tsjánjuan kjuachaxin kixin ijnkorá

chrókjuak'erá tjaná chjina la í jnkorá chrókjuak'erá tjaná kjon kixin janhan na tónahya tocar tsjánjuan tíha kixin tí sín a la xráxín ó tsíkónoxín —ichro ch'án.

<sup>41</sup> A ntá tió kuínhin tí ite sín xikaha tsintáchro tí sín a ntá kjuankixin kónínkakonhen sín tí ch'ín Jacobo la ko tí ch'ín Juan. <sup>42</sup> Ntá k'uíyēhe ch'ín Jesús kaín tí jehe sín ntá ntáche ch'án sín kixin:

—Ó nohará kixin tí sín t'etōan chjasintajni la imá t'etuenhen sín kaín chojni la ko tí sín imá tjetōan mé imá nchehnkehe asén sín kixin ihyé sín ts'etōan sín. <sup>43</sup> Kjánchó jahará la xikahya chrókjuich'erá. Náhí. Tí jnkojínrá tjinkáonrá chrókuétōanrá la chrókjuínkítsará tí í so sín. <sup>44</sup> A ntá tió jnkojínrá antsí chrókuétōanrá mé t'ichjánxin senó chrókjuákoxinrá chrókjuich'eherá kíchuará xra. <sup>45</sup> Kixin tí Xjeen Dios K'óna Chojni mé kuhya ch'án kixin chojni chrókjuich'ehe ch'án xra. Náhí. Ikui ch'án kixin sich'ehe ch'án sín xra la ko ts'enyákonhen nchónhya chojni kixin tsaáxin sín ch'án —ichro ch'án.

*Ch'ín Bartimeo k'uék'ikonhya ch'án ntá ch'ín Jesús kjuínchekitohe ch'án jína*

*(Mt. 20.29-34; Lc. 18.35-43)*

<sup>46</sup> Ntá kjuíji sín chjasin Jericó. Ntá ch'ín Jesús la ko tí sín k'uájiko ch'án la ko nchónhya chojni k'uaxrjexín sín tí chjasin ntiha. Ntá ntiha tjen ijnko ch'ín t'ikonhya mé it'in ch'án Bartimeo ntá it'é ch'án mé it'in Timeo. Tjetjaxin ch'án chrínta ntia tjanchak'á ch'án. <sup>47</sup> Ntá kuínhin tí ch'ín t'ikonhya kixin ó kuichjina ch'ín Jesús, mé tí nkexro kjuixin chjasin Nazaret, ntá tí ch'ín t'ikonhya kjuankixin t'èya ch'án ntáchro ch'án kixin:

—Jaha Jesús, tsík'axrjeníxian ch'ín David tikonóehéni —ichro ch'án.

<sup>48</sup> Ntá nchónhya sín k'uetuēnhen sín ch'án kixin tsotání ch'án. Ntá íchá antsí má tsen t'èya ch'án ntáchro ch'án kixin:

—Jaha, tsík'axrjeníxian ch'ín David tikonóehéni —ichro ch'án.

<sup>49</sup> Ntá ntahó kjuák'e ch'ín Jesús. Ntá k'uetōan ch'án kixin:

—T'iyēhéra tí ch'ín a —ichro ch'án.

Ntá k'uíyēhe sín tí ch'ín t'ikonhya ntá chénka sín ch'án kixin:

—Tócháha la t'inkatjen kixin tjet'iyaha ch'án. —ichro sín.

<sup>50</sup> Ntá kjuak'e ch'án tí ka titsáte ch'án ntá chrika k'uínkatjen ch'án kóchjinehe ch'án tí tjen ch'ín Jesús.

<sup>51</sup> Ntá ch'ín Jesús kjuanchankíhi ch'án tí ch'ín a kixin:

—¿Xá nkehe tjinkávan chrókjuít'ahá? —ichro ch'án.

Ntá kjuátehe tí ch'ín t'ikonhya ntáchro ch'án kixin:

—Maestro, tjinkaonni kixin chrók'uikonni —ichro ch'án.

<sup>52</sup> Ntá ntáche ch'ín Jesús tí ch'ín a kixin:

—Ijie la jína sátsjia. Ó kuítóha jína kixin kuítekávan tí janhan —ichro ch'án.

Ntá tuénxín tí ch'ín t'ikonhya la ó k'uíkon ch'án ntá chréhe ch'án tí ch'ín Jesús.

## 11

*Ntá ch'ín Jesús k'uíxēnhen ch'án chjasin Jerusalén  
(Mt. 21.1-11; Lc. 19.28-40; Jn. 12.12-19)*

<sup>1</sup> Ntá tió kjuíji chjina sín chjasin Jerusalén chjinaxón tí chjasin Betfagé la ko chjasin Betania chok'èxin tí jna Olivo ntá k'uetuēnhen ch'ín Jesús iyó tí sín k'uájiko ch'án, <sup>2</sup> ntá chro ch'án kixin:

—Sátjirá tí chjasin ntsí chok'èxin ntiha. Ntá ikon chjasin ts'ikonrá kixin ntaha tjechroé ijnko kolócho naxa ninkexró tjiták'áhya va. Ntá tjasintankehéra va ntá tsjikoanará va ntihi. <sup>3</sup> A ntá tí jnkojín chojni tsjanchankíhará sín kixin nkekuèté xikaha ch'erá ntá tsontáchrórá kixin: “Tí Maestro mé t'ichjánxinhin va ntá tió tsoxéhe va la tsjikaáni va”, ichrorá —ichro ch'án.

<sup>4</sup> Ntá jehe sín mé sákjuí sín k'uitja sín tí kolócho tjechroé va chjinaxón ntója nchia ntá kjuasintankehe sín va. <sup>5</sup> Ntá iso tí chojni tjejó ntiha kjuanchankí sín kixin:

—Nkekuèté xikaha ch'erá tjasintankehéra tí kolócho a? —mé chro sín.

<sup>6</sup> Ntá kjuáteexín sín éxí k'uetōan ch'ín Jesús. Ntá kjuanjōn sín kjuachaxin sátsjiko sín va. <sup>7</sup> Ntá tí kolócho mé kjuikohe sín ch'ín Jesús. Na ntá iké sín kjuínchekamá sín va, ntá kjuák'ekjen ch'ín Jesús. <sup>8</sup> Ntá itsjé chojni kuakitsje sín iké sín la kjuentoá sín tinkák'ikjínxin sín ka tí ntja ts'atsínkaxín ch'án. Ntá iso sín la mé tóchrínjin sín chaon nta itsá kayoa ntá xrákaō sín tinkát'itji sín ntja.

<sup>9</sup> A ntá tí sín tsitaón ntja la ko tí sín chréhe iton kjuankixin sín itsje sín chéhe sín ntá chro sín kixin:

—Tsjancheheni kjuasáyé Dios. Jína tí nkexro kuixin kjuachaxin ihnié Inchéni. <sup>10</sup> Jína tí kjuachaxién Dios itsi mé ts'etuēnhen tí nkexro k'uaxrjenixin it'éni David. Ntá tsjancheheni kjuasáyé Dios tjen nkaya nkajní —ichro sín.

11 Ntá k'uixenhen ch'ín Jesús chjasin Jerusalén la ko kjaxin k'uixenhen ch'án tí n̄inko jié tsjehe ch'án nkuixín tí nkaxenhen. Ntá ó kóntó ntá ch'ín Jesús sákjuíko ch'án tí teyó sín k'uájiko ch'án sákjuí sín chjasin Betania.

*Ch'ín Jesús kónínkakonhen ch'án ijnko nta t'óna to higo tsík'ónahya to*  
(Mt. 21.18-19)

12 A ntá tí kóyaon ntá kjanxin sín chjasin Betania ntá ch'ín Jesús mé k'uén ch'án kjinta. 13 Ntá k'uíkon ch'án kjín kixin itjen ijnko nta t'óna to higo itsá kayoa. Ntá sákjuítsjehe ch'án tí nta kixin ákué tsahya to. Ntá k'uíkon ch'án kixin jehó ka itsa tí nta a kixin jehya tí yaon ts'óna to. 14 Ntá nixjehe ch'ín Jesús tí nta t'óna to higo k'uetuenhen ch'án tí nta kixin:

—Í ninkexró sinehya tí to ts'óna tí jaha inaá —ichro ch'án.

A ntá tí sín k'uájiko ch'án mé kuínhin sín xikaha.

*Ch'ín Jesús kjuínchetjóá ch'án n̄inko*  
(Mt. 21.12-17; Lc. 19.45-48; Jn. 2.13-22)

15 Ntá kjuíji sín chjasin Jerusalén. Ntá k'uixenhen ch'ín Jesús nkaxenhen n̄inko a. Ntá kjuankixin ch'án k'uinkité ch'án tí sín nchekjixin nkehe ntiha la ko tí sín t'ena nkehe ntiha. A ntá kótéka ch'án tí mesa tjinkítóxixín sín chichaon la ko tí silla tjejókjen tí sín nchekji kontóá 16 la ko kjuanjonhya ch'án kjuachaxin kixin tsamá sín nkehe ts'ajixenhen sín n̄inko. 17 Ntá kjuakohe ch'án sín ntáchro ch'án kixin:

—Ntáchro xroon itén Dios kixin: “Tí ntóna i mé it'in nchia tsonixjanaxín chojni nkuixín nación”,

a ntá jahará tsíkjich'énaré itjueé xíchee\* —ichro ch'án.

<sup>18</sup> Ntá tí sín nchat'á t'etoan la ko tí sín maestro tjako tí ley na mé kuínhin sín tíha, ntá kjueyá sín nkexrí chrók'óyán sín ch'án, kjánchó chrakon sín kixin kóxrjínhin tí chojni tí nkehe kjuako ch'án.

<sup>19</sup> Kjánchó ntá ó kóntó ntá k'uaxrjexín ch'án tí chjasin a sákjuí ch'án.

*Ó tsíxámá tí nta t'óna to higo*

*(Mt. 21.20-22)*

<sup>20</sup> A ntá tí nchítjen k'uátsínka sín tí tjen tí nta t'óna to higo ntá k'uíkon sín kixin ó tsíxámáxin nuèe tí nta.

<sup>21</sup> A ntá ch'ín Pedro xráxinkaon ch'án ntáche ch'án tí ch'ín Jesús kixin:

—Maestro, tsjehé tí nta t'óna to higo kónínkakhén jna na ó tsíxámá nta —ichro ch'án.

<sup>22</sup> Ntá kjuátehe ch'ín Jesús ntáchro ch'án kixin:

—Tinkachónkirá Dios. <sup>23</sup> Chaxín ntáxrjan kixin jnkojínrá chróntácherá tí jna i kixin: “Sátjixián ntihi tjíkjiánkiá ntayaon”, a ntá tí kaín asánrá chrókuinkachónkirá Dios kixin chróxiteyá tí nkehe tsontáchrórá, ntá xikaha chaxín tsonhen.

<sup>24</sup> Mé xikaha ntáxrjan kixin kaín tí nkehe tsjanchehérá Dios tí tsítekáonrá kixin chaxín ts'ayéhérá ntá xikaha tsonhen tsoxiteyá. <sup>25</sup> A

ntá tió tjejonixjehérá Dios ntá jnkojín nkexro naxa ninkákhénrá, la chrók'uitjáyanhanrá tíha kixin It'ará tjen nkaya nkajni kjaxin chrókjuinchek'itjáyan ch'án tí jje chontará. <sup>26</sup> A ntá tí sinchek'itjáyanhyará tí ijje chojni ntá It'ará

\* **11:17** Isaías 56.7; Jeremías 7.11

tjen nkaya nkajní la kjaxin sinchek'itjáyanhya ch'án tí jie chontará.

*Tjanchankíhi sín tí ch'ín Jesús nkehe tí kjuachaxin chóna ch'án*

*(Mt. 21.23-27; Lc. 20.1-8)*

<sup>27</sup> Ntá xíkjan sín chjasin Jerusalén inaá. Ntá xritjak'e ch'án nkaxenhen nínko ntá kóchjina tí sín nchat'a t'etōan la ko tí sín tjako tí ley la ko tí sín táda t'etōan nínko <sup>28</sup> kjuanchankíhi sín ch'án kixin:

—¿Nkehe tí kjuachaxin chonta jaha kixin xikaha ch'e? ¿Nkexro tjáha tí kjuachaxin kixin xikaha kjuich'e? —ichro sín.

<sup>29</sup> Ntá kjuátehe ch'ín Jesús ntáchro ch'án kixin:

—Ntá kjaxin janhan tsjanchánkíhárá ijnko nkehe, siná á chrókjuáteherá, ntá tsotjonkará nkehe tí kjuachaxin chonta janhan kixin xikaha it'a. <sup>30</sup> ¿A ntá nkexro k'uetuēnhen ch'ín Juan kixin tsíkíte ch'án chojni? ¿Á Dios ní o á chojni ó? A ntá jie la tjáteherá —ichro ch'án.

<sup>31</sup> Ntá kjuankixin jehó sín tjo sín kichó sín kixin:

—Tí tsontáchroni kixin Dios tsík'etuēnhen tí ch'ín Juan ntá tsjanchankí tí ch'ín a kixin nkekuèté kuítekakuenhyani ch'án. <sup>32</sup> ¿Á chróntáchroni kixin chojni ó tsík'etuēnhen ch'án? —ichro sín.

Kjánchó chrakōnhen sín tí chojni chjasin kixin kaín sín kuítekaon sín kixin ch'ín Juan mé k'uénixja ch'án itén Dios. <sup>33</sup> Ntá ntáche sín tí ch'ín Jesús kixin:

—Noehyani —ichro sín.

Ntá ntáchro ch'ín Jesús kixin:

—La ko kjaxin janhan tsōxrjankahya nkexro kjuanjon kjuachaxin kixin xikaha t'a —ichro ch'án.

## 12

*Ch'ín Jesús mé kjuíncheyóexin ch'án éxi chojni ch'ehya xra jína*

*(Mt. 21.33-46; Lc. 20.9-19)*

<sup>1</sup> Ntá ch'ín Jesús kjuíncheyóexin ch'án inaá ntáchro ch'án kixin:

—Itjen ijnko ch'ín k'uenkaxin ch'án itsjé ntanòna t'óna to uva nontee ch'án la ko kjuích'éna ch'án corral la ko kjuích'éna ch'án ijnko tòye ts'énya sín to uva. A ntá kjuích'éna ch'án ijnko tjat'ò noi kixin ts'it'ótjen ch'án tsokotohe ch'án.

A ntá kjuínchekjen ch'án tí nonte iso chojni ch'e xra. Ntá sákjuí ch'án kjín. <sup>2</sup> Ntá tí kjuixraká tí yaon ts'óna to ntá k'uetuennen ch'án ijnko tí nkexro ch'ehe ch'án xra kixin sátsjikjanchehe ch'án tí sín ch'e xra jnkosiné tí to tsakja ch'án. <sup>3</sup> Ntá tí sín ch'e xra mé tsé sín tí ch'ín a, kjuate sín ch'án ntá ninkehó chjéhya sín ch'án ntá sákjuí ch'án. <sup>4</sup> A ntá tí ìché tí nonte mé xíchr'án ch'án tí í jnko nkexro ch'ehe ch'án xra. Ntá kjuíji ch'án ntiha ntá chjéhe sín ch'án xro kjuíncheníhi sín kja ch'án la ko k'uántaxínhin sín ch'án. <sup>5</sup> Ntá tí ìché tí nonte a xíchr'án ch'án í jnko chojni sákjuitsjehe ntiha. Ntá kjuíji ch'án ntiha ntá k'óyán sín ch'án. Ntá chr'éxin tí ìché mé xíchr'án ch'án í so nkexro ch'ehe ch'án xra sákjuitsjehe sín, kjánchó iso sín k'uékon sín la í so sín la k'óyán sín.

<sup>6</sup> Ntá jehe ch'án chóna ch'án jnkokoáxón xjeen ch'án na imá tjuèhe ch'án tí xjan a. Ntá kjuixixín chr'án ch'án tí xjan sákjuí xjan kixin kjuenkayáxin ch'án kixin: “Tsochóntehe sín kjuasáyé tí xjanna”, ichro ch'án. <sup>7</sup> A ntá tí sín ch'e xra a tjo sín kíchó sín kixin: “Tí ch'ín í mé ts'áyéhe kaín nkehe siín ntihi. A

ntá jie ts'óyánni ch'án, a ntá jeheni ts'áyéheni kaín tí nkehe a", ichro sín. <sup>8</sup> Ntá xíkaha itsé sín ch'án k'óyán sín ch'án ntá kuakitsjexín sín ntøe ch'án tí nontee ch'án.

<sup>9</sup> A ntá kjuanchankí ch'ín Jesús ntáchro ch'án kixin:

—¿A ntá nkehe chrókjuich'e tí ìnché tí nontee a? Chrókui ch'án chrók'óyán ch'án tí sín ch'e xra, a ntá chróchjéhe ch'án ókjé chojni.\*

<sup>10</sup> ¿Á kjuinchekuáxinhyará jahará tí xroon itén Dios? Ntáchro xíkíhí:

Tí xro náxrjónhya kuítóenta tí sín ch'éna tjat'ò, mé jie k'óna tí xro tjetóan.

<sup>11</sup> Mé xíkaha kjuíché Ìnchéni Dios, na ntá tíha mé ijnko nkehe kjuachrakon k'uíkonní† —ichro ch'ín Jesús.

<sup>12</sup> Ntá chrótsé sín tí ch'ín Jesús chrókjuak'echjina sín ch'án kixin kíenxín sín kixin kaín tí ntáchro ch'án la jehe ch'án k'uántaxínhín tí jehe sín. Kjánchó chrakon sín kixin nchónhya chojni kóchjina ntá kuítóhe sín ch'án ntá sákjuí sín.

*¿A jína chrókjuenkehe sín gobierno?  
(Mt. 22.15-22; Lc. 20.20-26)*

<sup>13</sup> A ntá ichr'án sín iso tí sín fariseo la ko iso tí sín kuènte ch'ín Herodes kixin tsjanchankíhi sín ch'án iso nkehe kixin tí ntoáhya chrókjuatèhe ch'án ntá jína chrók'ueka sín ch'án jie. <sup>14</sup> Ntá kjuíji sín tí tjen ch'ín Jesús ntáchro sín kixin:

—Maestro, ó noheni kixin tí nkehe chronka la chaxín tíha la ko jehya nkexrí tsjehe chojni tjenkayáxixián kixin á jína sín, la ko ntoá tjákua

\* **12:9** Isaías 5.1-7 † **12:11** Salmo 118.22-23

ntje Dios. ¿Á jína chrókjuenkehēni tí gobierno tí chichaon tjanchia? ¿Á chrókjuenkehēni sín ní o náhí? —ichro sín.

<sup>15</sup> Ntá ch'ín Jesús kjuátsoan ch'án kixin jehya jína tjenkayáxin sín ntáchro ch'án kixin:

—Jehya jína kixin tjáchaxinráni. Xrákōará ijnko tí chichaon tjanchia sín tsotsjáha —ichro ch'án.

<sup>16</sup> Ntá xráko sín ijnko tí chichaon tsotsjehe ch'án. A ntá kjuanchankí ch'án kixin:

—¿Nkexro tí tsík'axrjexín tjenkáni tí chichaon i la ko nkexro ihnié chóna? —ichro ch'án.

Ntá jehe sín kjuátehe sín kixin:

—Tí ch'ín t'etōan mé tjenkáni ch'án —ichro sín.

<sup>17</sup> Ntá kjuátehe ch'ín Jesús ntáchro ch'án kixin:

—Chróchjehérá tí ch'ín gobierno t'etōan tí nkehe kuènte ch'án; a ntá tí nkehe kuènte Dios la chróchjehérá Dios —ichro ch'án.

Ntá chrakon sín kixin xikaha kjuátehe ch'án.

*Kjuanchankí sín kixin á chaxín tsoxechón chojni  
(Mt. 22.23-33; Lc. 20.27-40)*

<sup>18</sup> A ntá iso sín saduceo kuitsjehe sín tí ch'ín Jesús. A ntá tí sín saduceo mé ntáchro sín kixin chaxínhya tsoxechón chojni tsík'en mé xikaha chrókjuachaxin sín tí ch'ín Jesús ntáchro sín kixin:

<sup>19</sup> —Maestro, ch'ín Moisés mé tsíkjin ch'án xroon ntáchro kixin tí ts'en ijnko savé chojni la ko naḡa tjen tí ichjién ch'án na ko tsíkjich'énahya sín xjeen sín ntá tí kichó tí nkexro tsík'en mé chrókuakja tí tjan k'án a ntá tí xjeen sín mé ts'óna éxí xjeen tí nkexro tsík'en.† <sup>20</sup> Kjánchó k'uéjó yato sín jnkokoá kichó sín. Ntá tí ch'ín saō mé kuákja ch'án ichjién

† 12:19 Deuteronomio 25.5

ch'án. Ntá ik'uén ch'án, kjánchó ninkehó xjan tsíkjich'énahya sín. <sup>21</sup> Ntá tí ch'ín tsoyo yóxin kuákja ch'án tí tjan k'án ntá k'uén ch'án koí ch'án. Ntá kjaxin tsíkjich'énahya sín xjan. A ntá tí ch'ín níxin kuákja ch'án tí jehe tjan ntá xikaha kónhen inaá. <sup>22</sup> Ntá kayatoé sín k'uéchónta sín tjan la ko kaín sín ik'uén sín la ko ninkehó xjan kjuích'énahya sín kaín sín. Ntá kjuixixín ntá k'uén tjan kjaxin tjan. <sup>23</sup> Ntá tió tsoxechón kaín xín chojni la, ¿Ntá nkexro ts'óna xì tjan kixin kayatoé sín tsikótehe tjan? —ichro sín.

<sup>24</sup> Ntá kjuátehe ch'ín Jesús ntáchro ch'án kixin:

—Ntoáhya tjenkayáxinrá kixin tiénxinhyará nkehe ntáchro tí xroon itén Dios la ko chonhyará tí kjuachaxién Dios. <sup>25</sup> A ntá tió tsoxechón tí chojni tsík'en la tsootehya sín la ko tsjanjonhya sín xjeen sín kixin tsootehe sín kixin tí sín tsík'en la éxí sín ángel ts'ejó sín nkaya nkajní. <sup>26</sup> A ntá tí tsoxechón tí sín tsík'en, ¿á kjuinchekukuáxinhyará tí xroon tsíkjin ch'ín Moisés chrónka nkexrí k'uénixjeexín Dios ijnko nta yoa tjeche ntáchro ch'án xikihi: “Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob”?§ <sup>27</sup> Méxra tí Dios i la jehya tinkáchónki tí sín tsík'en. Náhí. Jehe ch'án mé Dios tinkáchónki tí sín tjejóchón. Ntá jahará la imá tiénxinhyará kixin xikaha ichrorá tjanchankirá —ichro ch'án.

*Tí nkehe antsí imá tjetooan tsík'etoan Dios  
(Mt. 22.34-40)*

<sup>28</sup> Ntá kui ijnko ch'ín tjako tí ley kjuák'ekinhin ch'án nkexrí kjuachaxin sín ch'ín Jesús. Ntá

---

§ 12:26 Éxodo 3.6

kuínhin ch'án kixin imá jína kjuátehe ch'ín Jesús. Ntá kjuanchankí ch'án ntáchro ch'án kixin:

—¿Nkehe tí antsí tjetóan tsík'etóan Dios? —ichro ch'án.

<sup>29</sup> Ntá kjuátehe ch'ín Jesús ntáchro ch'án kixin:

—Tí nkehe antsí tjetóan tsík'etóan Dios mé tíhi: “Tinhínrá kaín rá chojni Israel kixin Ìnchéni Dios la mé jnkokoá la kohya í jnko nkexro. <sup>30</sup> Ntá kaín asánrá la ko kaín kjuaxrexinkaon kuéntará la ko kaín fuerza kuéntará chrótjuèxínrá.”\* Mé xikaha tí nkehe antsí tjetóan tsík'etóan Dios. <sup>31</sup> A ntá tí nkehe yóxin tsík'etóan Dios la mé tóyóhe na mé ntáchro xikihí: “Chrótjuèhérá kichuára éxí tjuèxínrá asánrá,”† la kohya í jnko nkehe antsí má tjetóan tsík'etóan ch'án —ichro ch'ín Jesús.

<sup>32</sup> A ntá kjuátehe tí ch'ín tjako nínko a ntáchro ch'án kixin:

—Ntoá ntáchrua tíha, Maestro kixin chaxín itjen jnkokoáxon Dios la ko kohya í jnko Dios.‡ <sup>33</sup> Noheni kixin kaín asénni la ko kaín kjuaxrexinkaon kuénténi la ko kaín fuerza kuénténi chrótjuèxínni Dios la ko chrótjuèheni kichó ni éxí tjuèxínni asénni.§ Tíha mé antsí má sínkí. A ntá kaín tí ko chrók'óyánni chrókjuanjónni chróchjánxin chrítaón altar la kánhyó tjetóan tíha —ichro ch'án.

<sup>34</sup> A ntá tió k'uíkon ch'ín Jesús kixin jína kjuenkayáxin ch'án kjuátehe ch'án ntá ntáchro ch'án kixin:

---

\* **12:30** Deuteronomio 6.4-5 † **12:31** Levítico 19.18 ‡ **12:32** Deuteronomio 4.35 § **12:33** Oseas 6.6

—Jaha la kjinhya tjen tí kjuachaxin kuènte Dios  
—ichro ch'án.

Ntá kóxakonhen sín ntá ninkexró kjuanchankíehya sín ch'án í so nkehe.

*¿Xá nkexro It'é tí Cristo?*

*(Mt. 22.41-46; Lc. 20.41-44)*

<sup>35</sup> Ntá ch'ín Jesús kjuák'ekjako ch'án tí ninko jíé.  
Ntá kjuanchankí ch'án ntáchro ch'án kixin:

—¿Nkexrí kixin tí sín tjako tí ley mé ntáchro sín kixin tí Cristo mé ts'axrjeníxin tí ch'ín David? <sup>36</sup> A ntá tí Nchakuen Dios mé kjuínkítsa tí ch'ín David ntáchro ch'án kixin:

Ìnchéni Dios ntáche tí Ìnchéni kixin:

“Tjak'e tjaná chjina ntihó tsétoan,

tsjixinjian kaín xín tí sín nínkakonhan la tsjachahya sín ts'etoan sín kixin jahvá mé tsétoan”\*

<sup>37</sup> ¿Xá nkexrí kixin Cristo chrók'óna xjeen ch'ín David kixin jehe ch'ín David ntáchro ch'án kixin Ìnché ch'án tí Cristo a? —ichro ch'án.

Ntá itsjé chojni k'uejókínhin sín kóxrjínhin sín tí nkehe kjuako ch'án.

*Ch'ín Jesús chrónka nkexrí ch'e tí sín tjako tí ley*

*(Mt. 23.1-36; Lc. 11.37-54; 20.45-47)*

<sup>38</sup> Ntá ch'ín Jesús kjuako ch'án ntáchro ch'án kixin:

—Tankíehyará tí sín tjako tí ley. Jehe sín mé tóxrjínhin sín chrók'uinkáya sín ka kjinjin la ko tjinkaon sín kixin kaín tí chojni tsoxeta sín ntja mé tsjikosáyehe sín. <sup>39</sup> Jehe sín xritjeyá sín tí nta antsí náxrjón ts'ejóyá sín tí nkaxenhen ninko. La ko kjaxin tió sátsji sín tí sine sín xritjeyá sín tí nta

\* 12:36 Salmo 110.1

antsí náxrjón ts'ejókjen sín sine sín. <sup>40</sup> La ko takitsje sín ntoe chojni k'án. La ko ch'iyexín sín chojni kixin isé nixjehe sín Dios kixin chrókuinhin chojni chróntáchro sín kixin imá jína tí jehe sín. Tí sín a mé antsí má tsjasóte sín —ichro ch'án.

*Tí ofrenda kjuanjon ijnko tjan k'án*  
(Lc. 21.1-4)

<sup>41</sup> A ntá jnkonaá mé ch'ín Jesús tjetjaxin ch'án nkaxenhen ninko chók'èxin tjen tí ntacajón tjetóxroyéya ofrenda. Ntá tjetsjehe ch'án kixin nchónhya chojni tinkáki sín chr'áxenhen sín chichaon tí ntacajón. La ko kjaxin nchónhya tí sín rico chr'áxenhen sín nchónhya chichaon tí ntacajón a. <sup>42</sup> Ntá kjaxin ntiha mé kjuí ijnko tjan k'án nòà tjan ntá chr'áxenhen tjan tí ntacajón yaá chichaon kánhyó tjete sínkí. <sup>43</sup> Ntá ch'ín Jesús k'uíyehé ch'án tí sín k'uájiko ch'án ntáchro ch'án kixin:

—Chaxín ntáxrjan kixin tí tjan k'án nòà tjan antsí tjete k'uíkon Dios tí chichaon chr'áxenhen tjan tí ntacajón, a ntá tí sín í so la kánhyó <sup>44</sup> kixin kaín sín la ó chichaon xéhe sín kjuanjon sín. Ntá jehe tjan la kjónté nòà tjan la kjuanjon tjan kaín tí chichaon k'uéchónta tjan chrók'uíte nkehe chrókjóne tjan —ichro ch'án.

## 13

*Ch'ín Jesús chrónka kixin tsoxíka ninko*  
(Mt. 24.1-2; Lc. 21.5-6)

<sup>1</sup> A ntá tió k'uaxrjexín ch'ín Jesús tí ninko jié ntá ijnko tí sín k'uájiko ch'án ntáchro ch'án kixin:

—Maestro, kjuánchí náxrjón tí xro la ko tí nchia tsík'óna —ichro ch'án.

<sup>2</sup> Ntá kjuátehe ch'ín Jesús ntáchro ch'án kixin:

—¿Á tsjehé jaha tí nchia jié tsík'óna ní? Tsjixraká tí yaon la í ninkehó xro ts'ejókjenhya kichó, la kaín tíha la tsoxika —ichro ch'án.

*Tí nkehe tsohnen chjina tí tsjixixín*  
(Mt. 24.3-28; Lc. 21.7-24; 17.22-24)

<sup>3</sup> A ntá sákjuí sín chrítaón tí jna Olivo chók'èxin tjen tí ninko a. Ntiha kjuák'etjaxin ch'ín Jesús. Ntá ntiha ch'ín Pedro, la ko ch'ín Jacobo, la ko ch'ín Juan, la ko ch'ín Andrés kjuanchankíhi sín ch'án nkehe, ntáchro sín kixin:

<sup>4</sup> —Tjinkaonni tsochronka nkesá tsohnen tíha la ko nkexrí tsonoexínni nkesá tsoxiteyá kaín tíha —ichro sín.

<sup>5</sup> Ntá ch'ín Jesús kjuátehe ch'án ntáchro ch'án kixin:

—Tóxakonhanrá t̄it̄oéhyará kixin ninkexró chrókjuít'ayahyará. <sup>6</sup> Nchónhya chojni tsi tsonáchro sín kixin jehe sín mé Cristo. Ntá xikaha sich'iyehé sín nchónhya chojni.

<sup>7</sup> A ntá tió tsinhínrá kixin tjanjonko kichó sín la t'óyán kichó sín la chrakonhyará tóxakuanhyará ó jehí tsohnen tíha. Kjónté xikaha naxa tsjejehya ch-jasintajni. <sup>8</sup> Ijnko nación tsjanjonko í jnko nación. La ntiha la ntaha la tsinkí nonte la ko itsjé chjasin na tsokjinta la ko ts'ixité sín tsonínkaon sín. Tíha na ntá xrankixixón tí kjuatjoté.

<sup>9</sup> Tóxakonhanrá jahará kixin mé tsjikaánrá sín nkayakon tí sín t'etqan ntá tí nkaxenhen ninko ntiha mé tsjatiaxínrá sín. Jahará t'ichjánxin tsochjinará tí tjejó tí sín gobernador la ko tí

sín rey kixin tinkachónkirá tí janhan; ntá ts-jachará tsochronkará nkexrí tinkachónkirá tí janhan nkayakon tí jehe sín. <sup>10</sup> Tí naxa ts'itjáyanhya chjasintajni la mé t'ichjánxin tsinhin chojni kaín xín nación tí tan jína tsaáxin sín. <sup>11</sup> Tió sátsjikoará sín tsjikaánrá sín tí tjejó tí sín t'etoan, la tóxakuanhyará nkehe tsjateherá la ko nkehe tsjenkayáxinrá. Náhi. Chronkará tí nkehe kjuanjon Dios tsontáchorá tí hora a, kixin jahyará tsonixjará. Náhi. Nchakuen Dios mé tsonixja. <sup>12</sup> Iso chojni kjónté naxa kjéhya sín tsjikaán tí kichó sín kixin its'en. La ko kjaxin xikaha iso chojni tsjikaán tí xjeen sín la ko kjaxin iso sín tsonínkakonhen sín tí it'é la ko iné la tsjikaán sín kixin its'en. <sup>13</sup> Kaínxín chojni chjasintajni tsonínkakonhanrá sín kixin tinkachónkirá tí janhan. A ntá tí sín tsítóehya tinkáchónki sín tí janhan hasta tsjixixín ná mé tsaá sín.

<sup>14</sup> Tsjixraká ijnko yaon ts'ikonrá tsjak'e tí nkehe jínahya tí chrókjuak'ehya éxí tsintáchro profeta Daniel\* —ntá tí chojni sinchekuáxin tí xroon i mé chrókuienxín sín tíha—, a ntá tí chojni tjejó estado Judea ts'ikon sín xikaha la sátsji sín tsochrin sín jna tsjík'ejómá sín. <sup>15</sup> A ntá tí sín tjejó chrítaón nchia la í chrók'uínkajinhya sín, chrók'uixenhya sín nkaxenhen nchia chrókuakitsje sín ichrén nkehe chóna sín. <sup>16</sup> Ntá tí sín tjejó nontee sín la í chrókjanhya sín naxa chrókjuikakja sín iké sín. <sup>17</sup> Ntá nòa tí chojni chjin ts'ejóyá tí yaon a la ko tí sín tjejónchekakí xjeen. <sup>18</sup> Chrókuanchehérá Dios kixin jehya nchakuen kin chrókónhen tíha. <sup>19</sup> A ntá tí yaon a mé imá kjuaxróxinhya ts'ejó chojni kixin ninkehó

\* **13:14** Daniel 9.27; 11.31; 12.11

yaon kuènhya xikaha desde ti kjuankíxixín Dios kjuích'éna ch'án chjasintajni la ko kjá xikahya tsonhen chr'éxin ínaá. <sup>20</sup> A ntá tí chrókjuanjon Ìnchéni Dios kjuachaxin kixin isé chrókónhen tíha, ntá ninkexró chrókjuacha chrókuaá. A ntá náhí la kuikonóhe ch'án tí sín tsíkjejá ch'án ntá k'uetōan ch'án kixin tjoka ts'atsínka tí kjuachrakon a.

<sup>21</sup> A ntá jnkojín nkexro tsontáchro kixin: “Tsjehe, ntihi itjen tí Cristo”, o tsontáchro sín kixin: “Tsjehe, ntiha tjen ch'án”, la titekákuènyará sín. <sup>22</sup> Na mé itsi iso sín tsontáchro sín kixin Cristo tí jehe sín la ko kjaxin itsi iso sín ntoáhya tsjako sín la ko tsjasin sín kjuaxroan jié tjinkaon sín chrókjuich'iyexín sín chojni, kjónté tí sín tsíkjejá Dios. <sup>23</sup> A ntá jahará chrokóxakonhanrá kaín tíha. Tjéjtōnkará senó kixin tsonohará kixin xikaha tsonhen.

*Itsi tí Xjeen Dios K'óna Chojni*

*(Mt. 24.29-35, 42-44; Lc. 21.25-36)*

<sup>24</sup> Ntá ts'atsínka tí kjuachrakon la ntá tí yaon la ts'inkaséyanhya, a ntá tí nitjó la tsjanjonhya xrohi. <sup>25</sup> A ntá tí konotsé la ts'anótjēnxin nkajní la ko tí kjuachaxin siín nkaya nkajní la kjaxin tsinkí. <sup>26</sup> Ntá ts'ikon sín tí Xjeen Dios K'óna Chojni itsi chríkjan tjuj tsíkao tí kjuachaxin jié. <sup>27</sup> Ntá tsochr'án ch'án tí sín ángel sátsji sín kuenté chjasintajni tsjikjenájín sín kaín chojni tsíkjejá ch'án.

<sup>28</sup> Chrókiénxinrá tí nkehe sintayóaxian. Éxí yóhe tí nta t'óna to higo tió sít'ayan kahntē ntá nohará kixin ts'ixenhen nchakuen sóa <sup>29</sup> mé xikaha tió ts'ikonrá xikaha tsonhen kaín tíha ntá tsonoaxínrá kixin ó kuichjina tí tsjeje chjasintajni. <sup>30</sup> Chaxín ntáxrjan kixin kaín tíha tsonhen tí naxa t'enhya tí

chojni siín chjasintajni. <sup>31</sup> A ntá tí nkajní la ko tí chjasintajni mé ts'itjáyan. A ntá tí nkehe ntáxrjan la ts'itjáyanhya, tsoxiteyá tíha.

<sup>32</sup> 'A ntá tí yaon la tí hora tsoxiteyá tíha la ninkexro noehya. Kjaxin noehya tí sín ángel tjejó nkaya nkajní la ko kjaxin tí Xjeen Dios K'óna Chojni la noehya. Ó jehó It'éni mé nohe.

<sup>33</sup> 'Méxra chrók'uejotsjehérá, chrók'uejochonhénrá chrónixjehérá Dios kixin noahyará nkesá la ko nkehora tsonhen tíha. <sup>34</sup> Éxí yóhe ijnko chojni sátsji kjín, a ntá tí naxa sátxínhya ch'án ntóe ch'án la senó tsochjéhe ch'án xra tí sín ch'ehe ch'án xra ts'ayakonhen sín ntóe ch'án, la jnkojnko sín ts'áyéhe sín jnkojnko xra kuente sín. La ko ts'etuñhen ch'án ijnko ch'ín tsjak'e ts'ayakonhen ch'án tí ntója nchia. <sup>35</sup> Méxra jahará chrók'uejotsjehérá kixin noahyará nkesá tsokjan tí ìché tí nchia a, á ijnko tsontanonte o á ijnko k'áxrótjen o á ijnko tjetee tsje cochiká o á ijnko ts'inkaséyan. <sup>36</sup> Ntá xrínahya tsi ch'án ts'itjaxín ch'án kixin tjejochrinrá. <sup>37</sup> Mé xikaha tjonkará la ko xikaha ntátjan kaín chojni kixin chrók'uejótsehe sín —ichro ch'án.

## 14

*Tjoyá sín kixin nkexrí tsotsé sín tí ch'ín Jesús  
(Mt. 26.1-5; Lc. 22.1-2; Jn. 11.45-53)*

<sup>1</sup> Naxa t'itjáyan iyó yaon ntá tsjasin sín tí kia pascua, la ko sine sín tí niotja tsíkjikohya tí xroan nchek'ánki niotja.

Ntá tí sín nchat'á t'etoan la ko tí sín maestro tjako tí ley mé kjueyá sín kixin nkexrí sich'iyehé sín tí

ch'ín Jesús kixin tsotsé sín ch'án a ntá ts'óyán sín ch'án. <sup>2</sup> Ntá ntáchro sín kixin:

—Kjánchó jehya yaon kia chrókónhen tíha kixin chrók'uixitéhya chojni chrókónínkaon sín —ichro sín.

*Ijnko tjan kuik̄itexín aceite náxrjón xraxé ikja ch'ín Jesús*

*(Mt. 26.6-13; Jn. 12.1-8)*

<sup>3</sup> A ntá ch'ín Jesús kjuák'e ch'án chjasin Betania ntøe ch'ín Simón, tí ch'ín k'uéchónta chinlepra. A ntá tí tjene ch'ín Jesús ntá xrínahya ikui injnko tjan kuik̄ao tjan injnko xro mé tjía tí aceite xraxé itsjo nardo, imá tjete tsík'ite. Ntá tí tjan a mé kuakitjehē tjan tí xro a ntá kuik̄ite tjan kja ch'ín Jesús tí aceite a. <sup>4</sup> A ntá iso tí sín tjejó ntiha kónínkakonhen sín tjan ntáchro sín kixin:

—¿Nkekuènte kjuínchexénhen tjan tí aceite náxrjón xraxé? <sup>5</sup> Íchá jína chrókóxi<sup>x</sup>in iní ciento chichaon denario tí aceite a ntá tí chichaon a mé chrókui<sup>t</sup>onhen tí chojni nòa —mé xik̄aha ichro sín k'uántaxín<sup>h</sup>in sín tjan.

<sup>6</sup> Ntá ntáchro ch'ín Jesús kixin:

—Nté t̄itohérá tjan; ¿nkekuènte t'antaxín<sup>h</sup>inrá tjan? Ó nchoxon tí nkehe kjuích'ena tjan. <sup>7</sup> A ntá tí chojni nòa la ó xráxín ts'ejókoará sín la jína tsjínk̄itsará sín jnkojín yaon. Ntá janhan la jnkochrín<sup>h</sup>ya ts'ejóni. <sup>8</sup> Ntá jehe tjan kjuích'e tjan káin nkehe tjinkaon tjan tsjanjon tjan. Ó senó kjuíncheka tjan xro<sup>a</sup>n cuerpo kuèntana kixin tsoxravána. <sup>9</sup> Chaxín ntáxrjan kixin ti tsjako sín tí tan jína tsaáxin chojni nkuíxín chjasintajni ntá tsochronka sín kixin xik̄aha kjuích'e tí jehe tjan,

a ntá xikaha tsoxraxinkakonxín sín tjan kixin xikaha kjuích'e tjan —ichro ch'án.

*Ch'ín Judas kjuinchekji ch'án tí ch'ín Jesús*  
(Mt. 26.14-16; Lc. 22.3-6)

<sup>10</sup> A ntá ch'ín Judas Iscariote mé ijnko teyóxin sín k'uájiko ch'ín Jesús a mé sákjuítsjehe ch'án tí sín nch'at'á t'etōan kixin tsochrónka ch'án nkexrí tsotsé sín tí ch'ín Jesús. <sup>11</sup> A ntá jehe sín la chéhe sín kuínhin sín ntá ntáchro sín kixin chaxín tsjanjon sín chichaon ts'áyéhe tí ch'ín Judas. Ntá kjuankixin ch'án kjueyá ch'án nkexrí tsochrónka ch'án kixin tsotsé sín tí ch'ín Jesús.

*Kjóneko sín tí ch'ín Jesús*  
(Mt. 26.17-29; Lc. 22.7-23; Jn. 13.2-30; 1 Co. 11.23-26)

<sup>12</sup> A ntá kui tí yaon xrankíxixín kia sine sín niotja tsíkjkohya tí xroan nchek'ánkí nio tió ts'óyán sín tí kolélo kuènte kia pascua. A ntá tí sín k'uájiko ch'ín Jesús mé kjuanchankíhi sín ch'án kixin:

—¿Nketí tjinkávan sátsjini sincheyaxíxinni kixin sineni kuènte tí kia pascua? —ichro sín.

<sup>13</sup> Ntá k'uētuenhen ch'án iyó tí sín k'uájiko ch'án ntáchro ch'án kixin:

—Sátjirá chjasin Jerusalén ntá ntiha tsoxetará ijnko ch'ín yámá tóa tjiá ntá. Tí ch'ín a tsochréhérá. <sup>14</sup> A ntá tí nchia ts'ixenhen ch'án la tsjanchankíhírá tí ìnché nchia, tsontáchrorá kixin: “K'uētōan tí Maestro kixin: ¿Nketí tjen tí cuarto sinexínko ch'án tí sín xriko ch'án tí kia pascua a?”, xikaha mé tsixrorá. <sup>15</sup> Ntá tsjakohará ch'án ijnko cuarto jíé, yóxin piso mé chóna kaín

nkehe t'ichjánxìn. Mé ntaha mé sìncheyaxíxinrá tí nkehe sineni —ichro ch'án.

<sup>16</sup> Ntá jehe sìn la sákjuí sìn chjasin Jerusalén na ntá éxí chrónka ch'ín Jesús mé xíkaha k'uitja sìn. Ntá tí cuarto a mé kjuíncheyaxíxin sìn tí nkehe sine sìn kuènte tí kia pascua.

<sup>17</sup> A ntá ó kóntó ntá ó kjuíji ch'ín Jesús la ko tí teyó sìn k'uájiko ch'án tí nchia ntiha. <sup>18</sup> Ntá k'uéjé sìn, a ntá tíó tjejóne sìn ntá ntáchro ch'ín Jesús kixin:

—Chaxín ntáxrjan kixin ijnko tí jahará tjejóne jnkokoá ntihi mé sinchekjiráni —ichro ch'án.

<sup>19</sup> Ntá jehe sìn mé kjuankíxin k'uává sìn. Ntá kjuankíxin sìn jnkojnko kjuanchankíhi sìn tí jehe ch'án kixin:

—¿Á janhan ní? —ichro sìn.

<sup>20</sup> Ntá kjuátēhe ch'ín Jesús ntáchro ch'án kixin:

—Jehe ch'án mé ijnko tí teyóxinrá, mé tí nkexro tjenekian jnkokoá plato ntihi. <sup>21</sup> Chaxín tí Xjeen Dios K'óna Chojni mé tsonhen éxí nixja xroon itén Dios. Kjánchó nàa tí ch'ín sinchekji ch'án. Íchá jína tí ch'ín a la chrókokjéhya ch'án —mé xíkaha ichro ch'án.

<sup>22</sup> A ntá nachrohe tjejóne sìn na ch'ín Jesús kuákja ch'án ijnko niotja, ntá kjuanchia ch'án kjuasáyé Dios. Ntá kjuixin ntá kóchrít'ó ch'án tí niotja ntá kjuanjon ch'án k'uáyéhe sìn. Ntá ntáchro ch'án kixin:

—Interá, tíhi mé cuerpo kuèntana —ichro ch'án.

<sup>23</sup> Na ntá kjaxin kuákja ch'án ijnko vaso na ntá kjuanchia ch'án kjuasáyé Dios ntá chjéhe ch'án sìn ik'uú sìn kaín sìn tí nkehe tjiá. <sup>24</sup> Ntá ntáchro ch'án kixin:

—Tíhi mé jnina mé chrónkaxín kixin chaxín tsoxiteyá tí nkehe nixin tsonhen na mé tsitjí kixin tsaáxin nchónhya chojni. <sup>25</sup> Chaxín ntáxrjan kixin ts'íhya janhan tí ìnté to uva ínaá tí naxa tsjixrakáhya tí yaon itsi kjuachaxin kuènte Dios, a ntá ti yaon a xik'ía ìnté to uva nixin —mé xikaha ichro ch'ín Jesús.

*Ntá ch'ín Jesús chrónka ch'án kixin ch'ín Pedro sinchemá ch'án kixin chónhya tí jehe ch'án*  
(Mt. 26.30-35; Lc. 22.31-34; Jn. 13.36-38)

<sup>26</sup> Ntá kjuixin itsje sín ijnko himno kuènte Dios ntá sákjuí sín tí jna Olivo. <sup>27</sup> Ntá ch'ín Jesús ntáchro ch'án kixin:

—Ijie tie kaín rá tsochakonrá ntá tsitonará. Ntá tsoxiteyá éxí ntáchro xroon iten Dios kixin: “Ts'óyán sín tí nkexro t'ayakonhen tí kolélo ntá tsokohya nkexro ts'ayakonhen va, a ntá tsjichroe va.”\* <sup>28</sup> A ntá tió tsoxechónna ntá sátsjia estado Galilea ntá ntiha tsoxetani —ichro ch'án.

<sup>29</sup> Ntá ntáchro ch'ín Pedro kixin:

—Kjónté kaín sín tsítóha sín ntá janhan la náhi —ichro ch'án.

<sup>30</sup> Ntá ntáchro ch'ín Jesús kixin:

—Chaxín ntáxrjan kixin ijie tie tí naxa tsjehya kochíntoa yáya, la jaha mé sinchemána níya kixin chonhyana, tsixrua —ichro ch'án.

<sup>31</sup> Ntá itsen kjuátehe ch'ín Pedro ntáchro ch'án kixin:

—Kjónté koína its'én la sintamáhya tí jaha —ichro ch'án.

La ko xikaha ntáchro sín kaín sín.

---

\* 14:27 Zacarías 13.7

*Ch'ín Jesús nixj̄exín ch'án Dios tí Huerto Getsemani*

(Mt. 26.36-46; Lc. 22.39-46)

<sup>32</sup> Ntá kjuíji sín ijnko nonte mé it'in Getsemani. Ntá k'uetuēnhen ch'ín Jesús tí sín k'uájiko ch'án kixin:

—Tjejorá ntihyó nachrohe janhan tsonixj̄aha Dios —ichro ch'án.

<sup>33</sup> Ntá sákjuíko ch'án tí ch'ín Pedro la ko tí ch'ín Jacobo la ko tí ch'ín Juan. Ntá kjuankixin imá k'uává asén ch'án kóxakonhen ch'án. <sup>34</sup> Ntá ntáche ch'án sín kixin:

—Imá t'ává asenná éxí chrók'uén xikaha. Ijie la ntihyó titohará tjejotsjehérá —ichro ch'án.

<sup>35</sup> Ntá sákjuí ch'án ijnko kjínhya ntá kjuák'exín toch'in ch'án. Ntá kjuankixin chrónóehē ch'án Dios kixin chrókjuanjon ch'án kjuachaxin kixin chrókjuasótehya ch'án tí nkehe chrókónhen ch'án tí yaon a. <sup>36</sup> A ntá ntáchro ch'án kixin:

—It'éní jaha. Jaha mé chonta kaín xín kjuachaxin na ntá chrónóahani tsjakjínhínni kaín tí jínahya tsonhenni tsjasóteni jie. Jehya kixin chrókónhen éxí tjinkaonni jeheni. Náhí. Éxí tjinkávan jaha —ichro ch'án.

<sup>37</sup> Ntá kjan ch'án ntá k'uitjaxín ch'án tí sín kuítóhe la tjejójua sín. Ntá ntáche ch'án tí ch'ín Pedro kixin:

—Simón, tjechrian jaha. ¿Xá xitjahya chrókjuak'etsjehé ijnko hora? <sup>38</sup> Ijie la tjejotsjehérá la ko chrónóehérá Dios kixin titóehya ch'án tí Jínahya chrókjuichroerá. Tí asánrá ntáchro kixin chrókjuinchexiteyará tí jína kjánchó tí cuérporá la tsjachahya —ichro ch'án.

<sup>39</sup> Ntá sákjuí ch'án inaá chrónóehe ch'án Dios. Ntá ó jehe xikahó xínixja ch'án. <sup>40</sup> Ntá ikjan ch'án la ó tjejójua sín inaá kixin kuihi sín kotáchrin. Ntá í noehya sín nkexrí chrókjuatehe sín. <sup>41</sup> Ntá nixin sáxíkji ch'án ntá kjan ch'án ntá ntáchro ch'án kixin:

—A ntá jie tjejochrinrá t'ok'áhará. Ntá ó tjen. A ntá jie kjuixraká tí hora kixin tí Xjeen Dios K'óna Chojni ts'áyéhe tí sín chóna jie sinchekjasóte sín ch'án. <sup>42</sup> Ntá t'àyará sátsjini kixin ó kjui tí nkexro sinchekjina.

*Sákjuíko sín tí ch'ín Jesús tsjak'echjina ch'án*  
(Mt. 26.47-56; Lc. 22.47-53; Jn. 18.2-11)

<sup>43</sup> Naxa tjenixja ch'ín Jesús ntá xrínahya kjuíji ch'ín Judas, mé ijnko tí teyóxin sín k'uájiko ch'ín Jesús. Nchónhya chojni kjuíkəo ch'án kjuíjiko sín chica espada la ko inta. Na mé kjuachaxién tí sín nchat'á t'ətoan la ko tí sín maestro tjako tí ley la ko tí sín táda t'ətoan nínko mé kjuixín sín.

<sup>44</sup> A ntá tí ch'ín Judas mé tí ch'ín sinchekji tsintáchro ch'án kixin:

—Tí ch'ín sinekian kochíto mé jehe tíha la itserá ch'án sájtikoará ch'án —ichro ch'án.

<sup>45</sup> Ntá kjui sín ntá tuénxín kóchjinehe ch'ín Judas tí ch'ín Jesús ntá ntáchro ch'án kixin:

—Maestro, Maestro —ichro ch'án.

Na ntá kjóneko ch'án kochíto. <sup>46</sup> A ntá tí sin kjuíji mé tsé sín tí ch'ín Jesús, sákjuíko sín ch'án.

<sup>47</sup> A ntá ijnko ch'ín tjentaxín ntiha mé kuakitsje ch'án chica espada kóchrínjin ch'án tətson tí ch'ín ch'ehe tí nchat'á t'ətoan xra. <sup>48</sup> Ntá ch'ín Jesús mé ntáche ch'án tí sín a kixin:

—¿Nkekuènté ḱixin éxí chrótserá xíchee mé xíkaha k'uinkakoará chica espada la ko inta ḱixin tsotseráni? <sup>49</sup> Kaín yaon kjuak'é nkaxenhen nínko kjuákoará, ¿ntá nkekuènté tsehýaráni? Kjánchó t'ichjánxin xíkaha tsonhen ḱixin tsoxiteyá tí nkehe nixja xroon itén Dios —ichro ch'án.

<sup>50</sup> Ntá kaín tí sín k'uájiko ch'án na mé kuítóhe sín ch'án jehó ch'án ntá sákjuí sín.

### *Ijnko ch'ín ntasoá sákjuixin ch'án ntiha*

<sup>51</sup> A ntá ijnko ch'ín ntasoá mé kjaxin tinkáchréhe ch'án ntiha, a ntá jehó ijnko kamantá tjetsáte ch'án, ntá kjaxin itsé sín ch'án. <sup>52</sup> Kjánchó tí ké ch'án ó tsítsé sín ntá kjónté tjóchin ch'án sákjuí ch'án.

### *Ch'ín Jesús kóchjina ch'án tí tjejó tí sín t'etoan*

(Mt. 26.57-68; Lc. 22.54-55, 63-71; Jn. 18.12-14, 19-24)

<sup>53</sup> Ntá sákjuíko sín tí ch'ín Jesús tí ntøe tí nchat'á imá t'etoan. Ntaha mé tsíkójnkotsé kaín tí sín nchat'á t'etoan la ko tí sín táda t'etoan nínko la ko tí sín maestro tjako tí ley. <sup>54</sup> Ntá ch'ín Pedro la ikjín tjechréhe ch'án ntá kjuíji ch'án tí ntasin ntøe tí nchat'á imá t'etoan a. Ntaha síche xrohi. A ntá ntiha tjejó tjaxin tí sín policía tjejóchjixrohe sín, ntá kjaxin ch'án ntahó kuítóhe ch'án tjechjixrohe ch'án.

<sup>55</sup> Ntá tí sín t'etuèhen tí sín nchat'á la ko kaín tí sín t'etoan kjueyá sín chojni ḱixin tsochrónka sín nkehe tí jiè chóna ch'ín Jesús ḱixin jína chrók'óyán sín ch'án. Kjánchó ninkexró k'uitjahya sín tsjinkítsa tsochrónka. <sup>56</sup> Kjánchó itsjé sín ntáchro sín kjuach'ia ó t'eka sín ch'án jiè ḱixin jnkokónhya

tí nkehe ntáchro sín. <sup>57</sup> Ntá k'uínkatjen iso sín ntá chaxínhya tí jie kjuanchia sín. Ntá ntáchro sín kixin:

<sup>58</sup> —Jeheni ó kuínhinni kixin ntáchro ch'án kixin ts'óxíka ch'án tí n̄inko tsíkjich'énaxín chojni tja ntá iní yaon koá la ó tsjak'e ch'án í jnko n̄inko jehya chojni sich'ena† —ichro sín.

<sup>59</sup> Kjónté xíkaha la jnkokónhya tí nkehe chrónka sín.

<sup>60</sup> Ntá tí ch'ín t'etuēhen tí sín nch̄at'á k'uínkatjen ch'án tí tjejó kaín sín ntá kjuanchankíhi ch'án tí ch'ín Jesús kixin:

—¿Á ninkehó tjateehya jaha? ¿Á chaxín tí jie t'eka sín tí jaha? —ichro ch'án.

<sup>61</sup> Ntá ch'ín Jesús tání ch'án la ninkehó tjateehya ch'án. Ntá xíkjanckhí tí nch̄at'á t'etoan ntáchro ch'án kixin:

—¿Á jaha tí Cristo Xjeen Dios imá tjóá? —ichro ch'án.

<sup>62</sup> Ntá ntáchro ch'ín Jesús kixin:

—Chaxín janhan tíha. Ntá chr'éx̄in ts'ikonrá kixin tí Xjeen Dios K'óna Chojni mé tsjak'etj̄ax̄in ch'án tí tja chjina kjuachaxin kuēnte Dios la ko it̄j̄ui mé ts'inkaj̄inx̄in ch'án nkaya nkaj̄ní —ichro ch'án.

<sup>63</sup> A ntá tí nch̄at'á t'etoan kótséchje ch'án tí iké ch'án kjuakox̄in ch'án kixin imá nínkaon ch'án ntáchro ch'án kixin:

—T'ichj̄ánx̄inhya í so chojni tsochrónka nkehe.

<sup>64</sup> Jahará ó kuínhínrá kixin k'uántax̄inh̄in ch'án Dios. ¿Ntá nkehe tsixrorá? —ichro ch'án.

Ntá kaín sín kjuátehe sín kixin chrók'uen ch'án.

<sup>65</sup> Ntá ikjé sín la kjuankixin sín kuik̄ite sín ch'án ntate sín. Na iso sín na k'uík̄jehe sín ikon ch'án na

† 14:58 Juan 2.19

ntá kjuate sín ch'án na ko kjuanchankíhi sín ch'án kixin:

—Tónoha kixin nkexro kjuatia —ichro sín.

A ntá tí sín policia kuente ninko chjéhe sín nkayakon ch'án.

*Ch'ín Pedro kjuínchemá ch'án kixin chónhya ch'án tí ch'ín Jesús*

*(Mt. 26.69-75; Lc. 22.56-62; Jn. 18.15-18, 25-27)*

<sup>66</sup> Ntá tí ntasin nonte itjen ch'ín Pedro. Ntá ikui ijnko tjan ch'ehe tjan xra tí nchat'á t'etoan. <sup>67</sup> Ntá k'uikon tjan kixin tjechjixrohe ch'ín Pedro. Ntá komá tjan ch'án ntá ntáchro tjan kixin:

—Jaha la kjaxin xrikoa tí ch'ín Jesús kjuixin chjasin Nazaret —ichro tjan.

<sup>68</sup> Ntá ch'ín Pedro kjuínchemá ch'án ntáchro ch'án kixin:

—Chonhya ch'án la ko nonahya tí nkehe ntáchrúa —ichro ch'án.

Ntá k'uaxrjexin ch'án ntiha sákjui ch'án ntója. Ntá xrínahya itsje ijnko kochíntoa. <sup>69</sup> Ntá tí tjan a mé k'uikon tjan tí jehe ch'án ntá chénka tí sín sntaxin ntaha kixin:

—A ntá tí ch'ín i mé jnkojin tí sín a —ichro tjan.

<sup>70</sup> Kjánchó kjuínchemá ch'án inaá. Ntá antsí chr'éxin tí sín k'uéjontaxin ntáche sín tí ch'ín Pedro kixin:

—Chaxin kjaxian jaha tsíkjixian estado Galilea kixin tjatsoanxinni kixin nixja jaha éxi nixja tí jehe sín —ichro sín.

<sup>71</sup> Ntá ch'ín Pedro kjuankixin ch'án kjuínchenohe ch'án Dios ntáchro ch'án kixin:

—Chonhya tí ch'ín ntáchrórá jahará —ichro ch'án.

<sup>72</sup> Ntá yóxin itsje kochínto̱a. Ntá ch'ín Pedro mé xraxinkaon ch'án kixin nkexrí ó chrónka ch'ín Jesús kixin: “Naxa tsotsjehya kochínto̱a yáya mé ó tsjixin sìnchemána níya kixin chonhyana.”† Ntá xraxinkaon ch'án tíha la ntá kjuankíxin ch'án tsjánka ch'án kixin ntoáhya kjuích'e ch'án kjuínchemá ch'án tí ch'ín Jesús.

## 15

*Ch'ín Jesús nkayakon tí ch'ín Pilato  
(Mt. 27.1-2, 11-14; Lc. 23.1-5; Jn. 18.28-38)*

<sup>1</sup> A ntá ó k'uínkaséyan ntá tí sín nchat'á t'eṯoan kójnkotséko sín tí sín táda la ko tí sín tjako tí ley la ko kaín tí sín t'eṯoan kuènte nínko mé kójnkotsé sín ikjo kichó sín. Ntá kjuixin ntá kjuínchenteto sín tí ch'ín Jesús ntá kjuíkaán sín ch'án tí tjen tí ch'ín Pilato. <sup>2</sup> Ntá tí ch'ín Pilato mé kjuanchankí ch'án ntáchro ch'án kixin:

—¿Á jaha tí Rey kuènte tí sín judío? —ichro ch'án.

Ntá kjuátehe ch'ín Jesús ntáchro ch'án kixin:

—Kjaxian jaha ntáchrua —ichro ch'án.

<sup>3</sup> A ntá tí sín nchat'á t'eṯoan mé k'ueka sín ch'án nchónhya jie. <sup>4</sup> Ntá ch'ín Pilato xíkjanckankí ch'án inaá ntáchro ch'án kixin:

—¿Jaha, nkekuénté tjáṯehya ninkehó? Tsjehé kixin nchónhya jie t'eka sín tí jaha —ichro ch'án.

<sup>5</sup> A ntá ch'ín Jesús la ninkehó kjuáteehya ch'án. Ntá ch'ín Pilato la í noehya ch'án nkehe tsjenkayáxin ch'án.

---

† 14:72 Marcos 14.30

*K'uíyéhe ch'ín Jesús kixin sinchekjasóte sín ch'án ntá its'en ch'án*  
(Mt. 27.15-31; Lc. 23.13-25; Jn. 18.38—19.16)

<sup>6</sup> A ntá ch'ín Pilato mé kuènhen ch'án kixin tí kia a tsjanjon ch'án kjuachaxin kixin sátsji ijnko chojni tjechjina, éxi tjinkaon tsjanchia tí sín tsíkójnkotsé tí kia a. <sup>7</sup> A ntá ntiha tjechjina ijnko ch'ín mé it'in Barrabás, la ko í so sín kuítekakuenhya sín tí síxreé ntá k'óyán sín chojni. <sup>8</sup> Ntá kui nchónhya chojni kjuankíxin sín kjuanchehe sín tí ch'ín Pilato kixin chrókjuich'e ch'án éxi kaín nánó xíkaha. <sup>9</sup> Ntá kjuátehe ch'ín Pilato kixin:

—¿Á tjinkáonrá tsitohá sátsji tí ch'ín Rey t'etuenhen tí sín judío? —ichro ch'án.

<sup>10</sup> Mé xíkaha ichro ch'án kixin jehe ch'án la ó nohe ch'án kixin kjuachjinoxínhin xriko tí sín nchat'á t'etōan, a ntá tsé sín tí ch'ín Jesús kjuíkénhen sín ch'án. <sup>11</sup> A ntá tí sín nchat'á t'etōan a mé kjuínchekóninkaon sín kaín tí chojni síin, ntáche sín kixin íchá jína chrókjuanchia sín kixin chrók'uatjánta ch'án tí ch'ín Barrabás. <sup>12</sup> Ntá ch'ín Pilato kjuanchankí ch'án ntáchro ch'án kixin:

—A ntá tí ch'ín tikítexínrá kixin ch'ín Rey t'etuenhen tí sín judío la ¿nkehe tjinkáonrá sit'aha ch'án? —ichro ch'án.

<sup>13</sup> Ntá jehe sín kjuátehe sín k'óyako sín kjuanchia sín kixin:

—¿Tjakénkǎnia ch'án ntacruz!

<sup>14</sup> Ntá ch'ín Pilato mé kjuanchankíhi ch'án tí jehe sín kixin:

—¿Xá nkehe tí jínahya kjuích'e ch'án? —ichro ch'án.

Kjánchó antsí má itsen k'óyako sín kjuanchia sín kixin:

—¡Tjakénk<sub>ani</sub> ch'án ntacruz! —ichro sín.

<sup>15</sup> Ntá ch'ín Pilato mé tjinkaon ch'án sinchexiteyá ch'án tí nkehe kjuanchia tí sín k'uíxité ntá kuítóhe ch'án kixin sátsji tí ch'ín Barrabás. Ntá k'uet<sub>oan</sub> ch'án kixin tsjate sín tí ch'ín Jesús. Ntá kjuixin ntá kjuanjon ch'án kjuachaxin kixin tí sín soldado sátsjiko sín ch'án tsjak'enk<sub>ani</sub> sín ch'án ntacruz.

<sup>16</sup> Ntá tí sín soldado a mé sákjuíko sín ch'án tí ntasin tí palacio. Ntaha kójnkotséxin kaín tí sín soldado. <sup>17</sup> Ntá ntiha kuakitsje sín iké ch'án ntá kjuínchek'inkáya sín ch'án ijnko ka kjátse tié la ko kjuak'enk<sub>aya</sub> sín kja ch'án ijnko corona tsík'óna ntach'í. <sup>18</sup> Ntá kjuankixin k'uíxité sín ntáchro sín kixin:

—Jnkochrín tsjak'e tsétuenhén tí sín judío —ichro sín.

<sup>19</sup> Na ntá ntavara chjéhe sín ikja ch'án na ko ntaté sín kuikite sín ch'án. K'uéjoxin toch'in sín nkayakon ch'án kjuích'eyáxixín sín éxí imá chrókjuikosáyehe sín ch'án. <sup>20</sup> Ntá tió kjuixin xikaha kjuích'ehe sín ch'án kjuanoá sín ch'án ntá kuakitsjehe sín ch'án tí ka kjátse tié tsíkjinchek'inkáya sín ch'án ntá kjuínchek'inkáya sín ch'án iké ch'án xráxín inaá. Ntá kuakitsjexín sín ch'án ntiha sákjuíko sín ch'án kixin ntá tsjak'enk<sub>ani</sub> sín ch'án ntacruz.

*Ntá kjuak'enk<sub>ani</sub> sín ch'ín Jesús ntacruz  
(Mt. 27.32-44; Lc. 23.26-43; Jn. 19.17-27)*

21 **A** ntá ijnko ch'ín tsíkji<sub>x</sub>in chjasin Cirene, mé it'in ch'án Simón, mé xjeen ch'án mé tí ch'ín Alejandro la ko tí ch'ín Rufo, mé tsíkji<sub>x</sub>in ch'án nontee ch'án, ntá k'uátsínka ch'án ntiha. Ntá tí sín soldado a mé k'uetuēnhen sín ch'án kixin tsochréhe ch'án tsamá ch'án tí ntacruz tsjak'enkáni ch'ín Jesús.

22 **A** ntá sákjuiko sín tí ch'ín Jesús ijnko tjo it'in Gólgota, na mé nkívee sín t'axrjexín kixin Tjo Calavera. 23 Ntá ntiha chjéhe sín ch'án xranvino tsík'ixinkíkjanxín xroan mirra chrók'ui ch'án, kjánchó k'uíhya ch'án. 24 Ntá tí sín soldado kjuak'enkáni sín ch'án tí ntacruz a. Kjuixin ntá kjuích'exín sín suerte tí ké ch'án kixin tsonohe sín nkexéhe tí ka sátsjiko sín jnkojnko sín.

25 **A** ntá ó las nueve nchítjen tí kjuak'enkáni sín ch'án tí ntacruz a. 26 Ntá ikja tí ntacruz kjuak'enkáni sín ijnko ntachiso ntsí tsíkjin sín nixja nkekuènte kjuínchekjasóte sín ch'án na mé ntáchro kixin: “Jehe ch'án mé Rey kuènte tí sín judío”. 27 Na ko kjaxin k'uéjójyáni sín ntacruz yaá tí síchee la ijnko la nánko chjina la íjnko la nó kjon tí tjen ch'ín Jesús. 28 Na mé xikaha xiteyá éxí nixja xroon itén Dios ntáchro kixin: “Éxí yóhe ijnko chojni kjuasin jje mé k'uíkon sín ch'án”\*.

29 Ntá tí sín k'uatsínka ntiha mé kjuanoá sín ch'án la ko k'uántaxínhin sín ch'án tinkátjía kja sín ntáchro sín kixin:

—Kjá na ntáchrúa kixin chrók'oxíka tí njnko, a ntá iní yaon koá la ó chrókjuixin chrókjuich'éna ínaá,† ichrua. 30 Nchekaá asán jahvá tjasinkajinxián tí ntacruz méhe —ichro sín.

\* 15:28 Isaías 58.12 † 15:29 Marcos 14.58; Juan 2.19

<sup>31</sup> Ntá tí sín nchat'á t'et<sub>o</sub>an la ko tí sín tjako tí ley mé kjuanoá sín ch'án ikjo sín kichó sín kixin:

—Ó kjuínchekaá ch'án chojni ókjé ntá jehe ch'án mé xitjahya sinchekaá ch'án asén ch'án. <sup>32</sup> A ntá chaxín jehe ch'án tí Cristo tí Rey kuènte tí naci<sub>o</sub>n Israel ntá chrók'uikonni kixin jehó ch'án chrókjuinkajinxin ch'án asén ch'án tí ntacruz ntá kjaxin chrókuitekaonni ch'án —ichro sín.

Kjonté tí yaá sín kjaxin tjejóyáni ntacruz mé k'uántaxínhin sín ch'án.

*Ntá k'uén ch'ín Jesús*

*(Mt. 27.45-56; Lc. 23.44-49; Jn. 19.28-30)*

<sup>33</sup> A ntá tió kui chonkixin mé k'uíxin tie kuenté chjasintajni, kóxrjenhen tí sítié hasta las tres kónjín <sup>34</sup> ntá tí hora a mé itsen k'uèya ch'ín Jesús ntáchro ch'án kixin:

—Eloi, Eloi, ¿lama sabactani? —tí nkívee sín mé t'axrjexín kixin: It'éni, It'éni, ¿nkekuènté kuitohéni?, † mé xikaha ichro ch'án.

<sup>35</sup> Ntá iso sín siín ntiha kuínhin sín, ntá ntáchro sín kixin:

—Tinhínrá kixin t'íyehé ch'án tí ch'ín Elías tí ch'ín k'uéchrónka itén Dios ósé —ichro sín.

<sup>36</sup> Ntá ijnko tí jehe sín siín ntiha kuinká ch'án kuákja ch'án ijnko ka ntá kjuínchekjataxín ch'án vino náxrjónhya ntá kjuak'ekjen ch'án ijnko nta kjinjin ntá kjuínchechjina ch'án tí tjen ir'va ch'ín Jesús chrók'ui ch'án tí vino náxrjónhya. Ntáchro tí ch'ín a kixin:

—Tsítóheni tsotsjeheni á chaxín tsi tí ch'ín Elías tsjinkajín tí jehe ch'án —ichro ch'án.

---

† 15:34 Salmo 22.1

<sup>37</sup> Ntá ch'ín Jesús itsen k'uíyato ch'án ntá kjuixin k'uén ch'án. <sup>38</sup> A ntá tí ka tjenkákúenxín nkaxenhen n̄nko mé yaá k'óna k'uichje kjuankíxixín noi la hasta nonte k'uichje. <sup>39</sup> Ntá tí ch'ín capitán romano mé tjen ch'án chok'èxin tí tjen ch'ín Jesús ntá k'uíkon ch'án kixin x̄ikaha ó kjuixin k'uén ch'án ntá ntáchro ch'án kixin:

—Chaxín tí nkexro i la Xjeen Dios —ichro ch'án.

<sup>40</sup> Kjaxin ntiha k'uejó iso chojni chjin, ikjín k'uejó sín tsjehe sín. Tjejóko sín tjan María Magdalena la ko í jnko tjan María na mé ijnko xjeen tjan it'in Jacobo na mé tí ch'ín tsoyo, ichro sín, la ko í jnko mé it'in José. La ko kjaxin ntaha kjuák'e tí tjan Salomé. <sup>41</sup> A ntá tí chojni chjin i mé kuinkáchréhe sín tí ch'ín Jesús ntá kjuikao sín ch'án kixin k'uékjinkitsa sín ch'án tí k'uékjak'e ch'án estado Galilea la ko kjaxin í so chojni chjin inaá chréhe sín ch'án sákjuíko sín ch'án chjasin Jerusalén.

### *Ntá xrává ch'ín Jesús*

*(Mt. 27.57-61; Lc. 23.50-56; Jn. 19.38-42)*

<sup>42</sup> A ntá ó kóntó tí yaon a mé tí yaon t'óyaxínhin sín kixin tí xrankíxixín tí yaon t'ok'éhe sín, <sup>43</sup> mé kui ijnko ch'ín it'in José chjasén ch'án mé Arimatea. Jehe ch'án mé koí ch'án t'etoan ch'án tí x̄ra kuènte tí síxreé. Kjaxin jehe ch'án tjechónhen ch'án itsi tí kjuachaxin kuènte Dios. Chrakonhya ch'án sákjuí ch'án ntoe ch'ín Pilato kjuíkjanhia ch'án tí cuerpo kuènte ch'ín Jesús. <sup>44</sup> Ntá ch'ín Pilato chrakon ch'án kixin ó tsíkjixin tsík'en ch'ín Jesús, ntá k'uíyehē ch'án tí ch'ín capitán a kjuanchankíhi ch'án kixin á chaxín x̄ikaha kónhen. <sup>45</sup> Ntá chrónka tí ch'ín

capitán kixin chaxín ó kjuixin k'uén ch'án. Ntá kuínhin ch'ín Pilato xikaha ntá kjuanjon ch'án kjuachaxin kixin tsjikakja ch'ín José tí cuerpo kuènte ch'ín Jesús. <sup>46</sup> Ntá ch'ín José mé k'uena ch'án ijnko ka sávana náxrjón. Ntá kjuinkajin ch'án tí cuerpo kuènte ch'ín Jesús, a ntá jehe tí ka a mé kjuínchek'isímá ch'án tí cuerpo kuènte ch'án. Ntá kjuak'enkaya ch'án ijnko tòye tsíxrayá itjo. Ntá ijnko xro jié mé k'uikjèxin ch'án tí ntója tí tòye. <sup>47</sup> A ntá tí tjan María Magdalena la ko tí tjan María ìné ch'ín José mé k'uíkon sín nketí xrává ch'án.

## 16

### *Ó xechón ch'ín Jesús*

*(Mt. 28.1-10; Lc. 24.1-12; Jn. 20.1-10)*

<sup>1</sup> A ntá tió k'uátsínka tí yaon t'ok'éhe sín ntá tí tjan María Magdalena la ko tí tjan María ìné ch'ín Jacobo la ko tí tjan Salomé mé k'uena sín xroan xraxé sátsjiko sín sincheka sín tí cuerpo kuènte ch'ín Jesús. <sup>2</sup> Ntá imá nchítjen tí yaon xrankíxixín tí semana mé kjuíji sín tí tòye tsíxravá ch'án, na mé ó kjuiton yaon. <sup>3</sup> A ntá jehe sín mé tinkákjo kichó sín kixin:

—¿Xá nkexro tí chrókuakjìnhinni tí xro tjejkèxin tí tòye? —ichro sín.

<sup>4</sup> A ntá xrínahya k'uíkon sín kixin ó tsíkjixin tsíkjin tí xro jié tjejkèxin tí tòye kixin í tjenhya éxí k'uékjak'e senó. <sup>5</sup> Ntá kjuíji sín ikon tí tòye ntá k'uíkon sín kixin tjetjaxin ijnko ch'ín ntasoá tí tja sín chjina tjenkáya ch'án ka kjinjin tjóá ntá imá chrakon sín k'uíkon sín. <sup>6</sup> Ntá ntáchro ch'án kixin:

—Chrakonhyará. Ó nòna kixin xritjéyará jahará tí ch'ín Jesús tsíkjixin chjasin Nazaret kjuák'enkání ch'án ntacruz. Ntá ó tsíxechón ch'án í kohya ch'án ntihi. Tsjehérá tí tsíkjak'e sín ch'án. <sup>7</sup> Ntá sátjirá tjíchenkará tí sín k'uék'ajiko ch'án la ko tí ch'ín Pedro kixin tí ch'ín Jesús senó sátsji ch'án estado Galilea ntá ntaha tsoxetará ch'án éxí tsíchrónka ch'án —mé xíkaha chrónka tí ntasoá a.

<sup>8</sup> Ntá tí chojni chjin a mé sákjuíxin sín tí tsíxravá tí ch'ín Jesús imá síxránkà sín chrakon sín. Ntá naxa chenkahya sín ninkexró kixin chrakon sín.

*Ch'ín Jesús titàya xeta tí tjan María Magdalena  
(Jn. 20.11-18)*

<sup>9</sup> Tió tsíkjixin tsíxechón ch'ín Jesús nchítjen tí yaon xrankíxín semana ntá titàya xeta ch'án saoxín tí tjan María Magdalena na mé jehe tjan tsíkakitsjexín ch'án yato nchakuen tí jínahya. <sup>10</sup> Ntá sákjuíchenka tjan tí sín k'uék'ajiko tí jehe ch'án t'avá sín tsjánka sín. <sup>11</sup> A ntá tió kuínhin sín kixin tjechón tí ch'ín Jesús kixin xíkaha tsík'ikon tjan la kjónté kuítekakonhya sín.

*Iyó sín k'uék'ajiko ch'ín Jesús titàya k'uíkuèn sín tí jehe ch'án  
(Lc. 24.13-35)*

<sup>12</sup> A ntá chr'éxin ntá iyó tí sín a titàya k'uíkuèn sín tí ch'ín Jesús, ókjé nkexrí tsjehe ch'án. Tí sín a mé tjejótti sín ntia sátsji sín ijnko nonte. <sup>13</sup> A ntá jehe sín sákjuíchenka sín tí sín í so a; la kjónté xíkaha la kuítekakonhya sín.\*

---

\* **16:13** Lucas 24.13–35

*Ch'ín Jesús k'uɛtuɛnhen ch'án tí sín k'uék'ajiko  
ch'án tí xra sich'e sín*

*(Mt. 28.16-20; Lc. 24.36-49; Jn. 20.19-23)*

<sup>14</sup> A ntá tió kjuixixín la titàya k'uíkon tí tejnko sín tí jehe ch'án tí tjejóne sín. Ntá nixjehe ch'án sín kixin nkekuènté icha asén sín tsíkitekakuenhya sín tí sín tsík'ikon kixin tsíxechón ch'án. <sup>15</sup> Ntá ntáche ch'án sín kixin:

—Sátjirá kuenté chjasintajni tjácohérá kaín xín chojni tí tan jína tsaáxin sín. <sup>16</sup> Tí nkexro tsitekaon la tsikite la mé tsaá. A ntá tí nkexro tsitekakonhya na mé tsjasóte. <sup>17</sup> Ntá tí sín tsinkáchónki tí janhan mé tsjasín sín kjuaxroan kixin kjuachaxin nina tsakitsjexín sín tí nchakuen tí jínahya chóna chojni la ko tsonixja sín ókjé nkìva. <sup>18</sup> Kjónté konche chrótsé sín la kohya nkehe tsonhen sín la ko kjónté chrók'ui sín ijnko ntá chóna veneno la kohya nkehe tsonhen sín. Kjaxin ts'ejotja tja sín chojni níhi la tsitohe sín jína.

*Ch'ín Jesús chrìin ch'án nkaya nkajní*

*(Lc. 24.50-53)*

<sup>19</sup> Ntá ó kjuixin nixjehe Ìnchéni Jesús tí jehe sín ntá sákjuí ch'án nkaya nkajní. A ntá ntiha kjuák'etjaxín ch'án tí tja chjina Dios. <sup>20</sup> A ntá jehe sín sákjuí sín nkuíxín sákjuíkjako sín tí tan jína tsaáxin chojni. A ntá jehe Ìnchéni mé kjuínkítsa ch'án tí sín a la ko kjuachaxién ch'án mé kjuasixín sín kjuaxroan kixin tíha mé tsonoexín tí sín tjejótinhin kixin chaxín nkehe kuènte Dios kjuako sín. Amén.

**Tí Nuevo Testamento cuènte Inchéni  
Jesucristo C'óna Nquìva  
New Testament in Popoloca, San Juan Atzingo**

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

**Copyright Information**

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Popoloca, San Juan Atzingo

**© 1982, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

b9b09122-b3f6-59f0-9594-749907b32b5b